

**Təntən sagı tə, Polə nə púpúní
 v pa
 Korəntə
 Kərisə lià tə nə
 Korəntə tián təntən sagı tə
 yuu wa svɡv**

Liù tə, v nə púpúní sagı kv tə
 Kú yí *təntənu Polə nə púpúní kv.

Lià tə nə, v nə púpúní

Kú yí təntən sagı tə, Polə nə púpúní v pa Kərisə lià tə nə, ba nə wulə Korəntə nə. Polə tətə nə dıga Kərisə lià púlí təntə dəń. Nəɲə kv tə yırı, Polə nə púpúní ba nə:

Kú máǵá tə wa, də Korəntə yí Gəresə nag-wanaa tə wa tıfaru don. Ywəɲə də yà dáá zənzən kv wa. Korəntə yà jə níá yuu borə yızıga bwálá bələ, tə nə pın, kv yí tiv tə jıjə nə wulə kv wa. Yolu yà vəli yáá zənzən kv wa. Korəntə tián dən yà twá pubonyirə mama nə də yıjəncoɲi yirə mama nə, tə nə pın lià tə tɔɲa yokəkwinan.

Sagı tə wa svɡv

Polə nì Korəntə lià tə ɲwen tə nə ba ywàń. Kú tə nə súrí lá, Korəntə tián yà tun sagı v nə, kv nə bwe bwıə zənzən, kv ga swın yojanan zənzən yoo. Polə dí yáá v bırı ba də ba púlí tə pwèe, v ga pìà, sə v pa ba pìí ba kə duən nə. D bırı ba nətv, ba nə mə, sə ba ya duən nə ndə

Kərisə lià nè, lià tə tətəŋi wa, ba nè twá luu yofwamunan nè. Ku kwa nè, Polə le Korentə Kərisə lià tə bwiə tə, v ga swìn kaswe yoo də badən nè à yèé kadən yoo, də Kərisə liù nè tu v tián nətʌ yoo, də Yu-Siŋu tarpunan yoo də nətʌ, ba nè mɛ, sɛ ba ja tə ba ma tʌn yoo, də yìèn duən.

Polə jùnì Kərisə lià tə Korentə nè

(Romə tián 1.1-7; Tɔtɔnan 18.1-11)

¹ Yu twá də v fira tə, v ma kúrí à mù Polə, sɛ à yà Zwezi-*Kərisə *tʌntʌnʌ. À mù də Sosətənə, v nè yɪ à nubiu Kərisə yɪɪ, nè púpúní sagɪ ku tə, nè pɪn aba. ² Ku yɪ nè púpúní ku, á mù Kərisə lià púlí tə nè, ku nè wulə Korentə nè. Yu twá də Zwezi-Kərisə, v li aba v tún, v pa v tián nè. U kúrí aba, sɛ á yà v mù nyiən. Sagɪ ku tə tà á mù Korentə tián cɪcɪ nyiən. Ku yɪ á mù də lià tə, ba nè wulə bwálí tə mama nè, ba ga boŋə ba kəni nè *Yuu-Tiu Zwezi-Kərisə yɪɪ tə nè nyiən. Zwezi-Kərisə təntə yɪ nè mù də ba mù mɛ Yuu-Tiu. ³ Nə nyɪna Yu də nè Yuu-Tiu Zwezi-Kərisə nè wá fwa pubwanʌ á yɪra, ba ga pa aba bɪcan sié.

Yu fwa zəni Korentə tián yɪra

(Filipə tián 1.3-6; Kolosə tián 1.3-6)

⁴ Á kəni Yu lèèèe wuuu, à pɪn aba. U twá də Zwezi-*Kərisə, v ma fwa v pubwanʌ tə á yɪra. ⁵ Á mù də Zwezi vwə duən nè. Ku mù nè pɪn, v ma pa aba tarpunan mama. Á nɪ Yu sùràn tə yənu zənzən, á ga yèé ku ka swìn ka

biru də. ⁶ Nə swìn Zwezi-Kərisə suywánú tə, nə biru aba. Yá suywánú tə cígá zua aba. ⁷ Yá tarpıun won tə mama, Yu nə fwa, ku wà aba mùrì. Á dān ya á dānì máǵá tə nə, *Yuu-Tiu Zwezi-Kərisə nə wá pıı v bà, v biru v tiàn, v nan á yía yuu. ⁸ D mù nə wá pa, á ga zıǵı dıàn Yu nyiən tə wa dıun mama, ku ja vələ luv zaǵu máǵá nə, Zwezi nə túrì dıun tə nə, sə á dānà ká ja yoo, ba nə wá caga á nii nə ku yırı. ⁹ Yu yı pùé nədv tíú, v tətə nə kúrí aba, sə á vwə v biù Zwezi-Kərisə yıra. D mù nə yı nə Yuu-Tiu.

Nimarv yà tələ Kərisə lià púlí tə wa Korentə nə

(1 Korentə tián 3.3-8, 21-22)

¹⁰ À nubıa-ba, à mù də á mù me yı nə vwə *Yuu-Tiu Zwezi-*Kərisə nə. Ku mù nə pın à lòrì aba, sə á cıǵv à sugv, à ma kwè aba. Á pıan á ya nədv, sə pııa dān ká yà á pwərə wa. Á dān kənə nii nədv, sə á ja pubuǵa nədv. ¹¹ À nubıa-ba, lià nan kan tə, ba nə boǵə Kəlowe* sàń con. Ba bà, ba swìn á yoo. Yá à nì də, ba wú, á dı jara də duən. ¹² Won tə, à nə pià, sə à swìn, ku mù nə yı də, á nii sùràn tə tà nədv. À nì də, lià wulə á wa, ba nə swìn də, ba mù wulə Polə kwa. Ba duən də kúv wú, ba də yı ba wulə Apolose kwa. Ba duən də kúv swìn, ba wú, ba də yı ba wulə Sefas† kwa. Ba duən də kúv swìn, ba wú, ba də yı ba wulə Kərisə

* **1:11** 1.11 Lià duən buǵa də, Kəlowe yà yı kayəlukan, v nə wulə Korentə wa. Yá v tütònà dān yà naǵa v con, ba vèli bwálí tə nə, Polə nə wulə lá. † **1:12** 1.12 Sefas ja yırı don, ba nə boǵə Piyerə.

kwa. ¹³ Kərisə yɪ v pwèe duən wa naaa? Ku yɪ à mù Polə nə, ba paa dagarv tə yuu wa, sə à tɪ á yɪri naaa? Nə à yèé ku yɪ à mù Polə yɪri tə nə, ba twá ba ma lə aba níá wa, ku twá də Yɪ yɪri tə naaa? ¹⁴ À kəni Yɪ lèèèe də, à nə wà á liù mama li níá wa, də ku nə tà Kərisəpísə də Gayisə cɪcɪ. ¹⁵ Ku nətv tə pɪn, liù mama wàri v swìn də, ku ya à mù yɪri nə, ba twá, ba ma lə aba níá wa. ¹⁶ Dhuvun, à líi də, à tə ləgə Sətefanasə də v diè lià níá wa. Ku tə, ku nə ga tə mù, à yèri də, à nə ləgə liù don níá wa. ¹⁷ Zwezi-Kərisə yɪ v tun nə, sə à swìn suywáŋú tə, à birɪ lià nə. U wà nə tun, sə à lə lià níá wa. À nə swìn suywáŋú tə, ku tà ləzoni wubɔŋa nə à ma swìn ku. À yà nə swìn ku də ləzoni wubɔŋa ku yà wá pa Zwezi-Kərisə tián tə dagarv tə yuu wa ya tutv ku pa ləzoni nə.

Yɪ diàn tə də v yənu tə

(1 Korəntə tián 3.18-20; Matíə 11.25-27)

¹⁸ Sɔgv tə, ku nə birɪ də, Zwezi-*Kərisə tɪga dagarv tə yuu wa, yɪ ləyəri yoo, ku pa lià tə nə, ba nə wulə cwəŋə wa, ku nə jén ba míámíán. Yá ku yɪ Yɪ diàn yoo, ku pa nə mù lià tə nə, nə nə wulə cwəŋə tə wa, Yɪ nə twá ku nə, v ma jon nəba nə cɔna wa. ¹⁹ Ku púpúní Yɪ sagɪ tə wa, ku wú:

«À wá cògù wubɔnyɪna wubɔŋa, à ga pa yənu tián də yənu jì tutv».

²⁰ Də Yɪ nə swìn nətv, wubɔnyɪən təlé. *Zwifə-ba Yɪ *nii yənu tíú kúv təlé. Tútɔnyɪən də təlé, máŋá ku tə wa. Yɪ pɪn, tɪa yuu ləzoni wubɔŋa tə jì ləyəri yoo. ²¹ Yɪ twá də v tətə

wubunja nə v ma biri də, v wà sèe, sə tia yuu wubunyina ba lwarı wá də ba tətə wubunja tə. Ku mù nə pın, Yu ma sóní, sə v jon là tə nə, ba nə keni ba waa v nə wuuu, ba cuna wa. Ku nətə twá v sùràn tə, nə nə swìn nə biri là nə, tə nə yi ndə ləyəri sùràn nə, wubunyina yáá con. ²² Zwifə-ba tə pià, sə ba na Yu diàn mımınu də yía, sə ba dān ma zıgı lá, ba pa cıgá ku. *Gərekə-ba də pià, sə ba lwarı yìèn tə də ba tətə wubunja. ²³ Yá nə mù yi Zwezi-Kərisə, ba nə paa dagarv tə yuu wa yoo, nə nə swìn nə biri. Ku kàrà təntə yi cuguguran, ku pa Zwifə-ba nə, ku ga yi ləyəri yoo, ku pa là tə nə, ba nə tà Zwifə-ba. ²⁴ Yá là tə, Yu nə kúrí, də ku nə yi Zwifə-ba, nə à yèé Gərekə-ba con, Zwezi-Kərisə nə biri Yu diàn tə də Yu wubunja tə. ²⁵ Yìèn duən ku yáá yi ndə Yu ya ləyəru. Ba me, sə ba lwarı də, Yu ləyəri dwə ba wubunja. Yìèn duən də wa, ku yáá yi ndə Yu ba diàn ja də. Ba me, sə ba lwarı də, Yu bwànì dwə ba diàn.

²⁶ À nubıa-ba, á ywànjá là tə, Yu nə kúrí, v kə duən nə, sə ba ya á púlí tə. Də ku nə yi tia yuu ləzoni wubunja wa nə, wubunyina ba dáá á wa. Ku nə kúv ya diàn yoo, də diàn tián ba dáá á wa. Nə à yèé ku nə kúv yi dun yoo, dun tián ba dáá á wa. ²⁷ Yu kúrí là tə, tia yuu ləzoni nə bunja də, ba yi ləyəren tə, sə v ma pa wubunyina tə ya tutv. D kúrí wiən tə, ba nə bunja də, tə ba diàn jə tə, sə v ma pa diàn tián tə ya tutv. ²⁸ Yu kúrí là tə, ba nə bunja də, ba ba dun jə tə, də ləzwənbii tə tia tə yuu wa. D kúrí là tə, ba nə ba jəli ba kəni là wa, sə v ma

pa dun tián ya tutv. ²⁹ Yu fwa ku nətə tə, sə tia yuu ləzwənə mama dàn ká bu v tián nə, v m̀ Yü yáá con.

³⁰ Də ku nə yí á m̀ yoo, ku twá də Yü, á ma vwə Zwezi-Kərisə yira. Yá Zwezi-Kərisə dàn nə yí nə wɔbɔŋa. Ku pìà ku bɪrɪ də, Zwezi nə kwən nə cuna tə v lɪ, sə nə ya cígá tián, sə nə yá nə tián míámíán Yü jìàn wa. Yá v yè nəba v jon də v jana tə, sə nə tɪnɪ nə tián. ³¹ Ku mɛ, sə ku ya ndə ku nə púpúní Yü sagɪ tə wa, ku ẃb:

«Liù tə, v nə pìà, sə v bwi liù nə, sə v bu *Yuu-Tiu nə, won tə cɪcɪ yɪrɪ, Yuu-Tiu nə fwa tə».

2

Polə yoo nə yí Kərisə, ba nə paa dagarv tə yuu wa

(2 Koréntə tián 4.5-7)

¹ À nubia-ba, mánjá tə, à nə twi á con, sə à swìn Yü cígá tə, ka nə sègè, à bɪrɪ aba, à wà sùràn tə, tə dèñ niu nə cà, nə à yèé ləzwənə wɔbɔŋa nə twá, à ma swìn ku á con. ² Ku mánjá tə wa, à wà sírí ken, sə à bɪrɪ yoo don á tətəŋi wa, də ku nə tà Zwezi-*Kərisə yoo. D m̀ Zwezi-Kərisə tə, ba nə paa dagarv tə yuu wa. ³ À m̀ Polə tətə twi á con, mánjá tə wa, də à ba diàn jə də fən yà jə nə, à ga vɪvaga zənzən. ⁴ À sugv tə də à kàrà tə ya tà ləzoni wɔbɔŋa sùràn, à ma swìn aba à dɪ. À kàrà tə mánjá wa, Yü-*Siŋu tə də Yü diàn tə nə ken à sùràn tə cwəŋə wa. ⁵ Ku m̀ nə pɪn, á nə ken

á waa Yü nə, tə kùv̀ tà ləzoni wubɔŋa yiri, ku yí Yü diàn tə yiri.

*Yü-Siŋu tə biri wubɔŋa mama
(Efəzə tián 3.2-11; 1 Zwan 2.20, 27)*

⁶ Nə kàrà tə, ku yí wubɔŋa nə, nə swìn nə biri lià tə nə, ba nə bori Yü cwəŋə tə wa. Ku wubɔŋa təntə tà síún luv wubɔŋa. Ku tà síún luv diàn tián yənu. Diàn tián nə yáá bà ba jén.

⁷ Yü wubɔŋa tə səgè tia yuu ləzoni yáá con. Mə tə mù yoo nə, nə mù swìn nə biri. Yü tanı ku v tún, də v tə wà luv fwa, sə v ma twá ku nə, v pa nə pìí nə na dun v mù Yü con. ⁸ Síún luv diàn tián wà ku wubɔŋa təntə lwarı. Də ba yà nə lwarı ku, ba yà bá paa *Yuu-Tiu tə, v nə yí dun tíú, dagarv tə yuu wa, ba gv. ⁹ Ndə ku nə púpúní Yü sagı tə wa, ku wú:

«Won wulə, ləzwənə yii nə wà ku nı míámían, v zıın nə wà ku nì míámían, v ga ba ku yoo buŋa v waa con də. Mə ku mù won təntə nə Yü tanı, sə v pa lià tə nə, ba nə swə wá».

¹⁰ Yü twá də v *Siŋu tə, v ma biri ku yoo təntə nə mù nə. Yü-Siŋu tə yáá balv won mama. Ku yáá balv Yü pubuŋa tə, ka nə lù tətə, ku lwarı ka dèń. ¹¹ Də nə nə tì ləzwənə nə ywǎń, nə yèé də, ku nə tà v tətə waa tə, nə yèé ku tə, v nə buŋa, liù don mama yèri ku. Mə ku yí nətı Yü də con, Yü-Siŋu tə cıci nə yèé won tə mama, Yü nə buŋa. ¹² Yü pın nəba Siŋu tə, ku nə nan v con, sə ku pa nə lwarı tarpıvıv tə, Yü nə ma fwa zəni nə yıra. Yá ku tà lià tə, luv nə kəni cwəŋə wa pubuŋa tə, nə

Yü pın nə mù nə. ¹³ Kù mù nə pın, nə ba ləzoni wubuŋa sùràn nə twá, nə ma swìn kù yoo. Kù yì nə twá kù tə nə, Yü-Siŋu tə nə bırı nəba. Mə nətü, nə nə twá, nə ma gùlí cígá tə, kù nə naŋa Yü con, nə bırı là tə nə, ba nə zílí Yü-Siŋu nii.

¹⁴ Ləzwənə tə, v nə twá v tətə pubuŋa nə, v ba Yü-Siŋu tə yoo sèe. Yü-Siŋu tə yoo yì ndə ləyəri yoo nə v con. Kù yà mə, sə Yü-Siŋu tə ya də wá, sə kù pa v nì kù dèh. Yá Yü-Siŋu tə dàń tələ də wá. Kù mù nə pın, v wàrì kù dèh v nì. ¹⁵ Yá ləzwənə tə, v nə zílí Yü-Siŋu tə nii, v mù wáá won mama dèh v lwarı. Liù don ga wàrì v mù dèh v lwarı. ¹⁶ Kù yì cígá, kù yì ndə kù nə púpúní Yü *saŋı tə wa, kù wú:

«Wàà nə yèé kù tə, Yüu-Tiu nə buŋa? Wàà ga nə wáá kwìè v pın Yüu-Tiu nə?»

Yá nə mù ja pubuŋa ndə Zwezi-*Kərisə pubuŋa tə nə.

3

Yü tütònà tə tutuŋı tə nə yì nətü

(Eberə-ba 5.11-14; 1 Korentø tìán 4.1-6)

¹ À nubıa-ba, à nə dí yáá à swìn á con tə, à yì à swìn á con, ndə là tə nə, ba tə nə twá ba tətə pubuŋa nə, ba nə yì ndə bìsíná nə Zwezi-*Kərisə kwa. À wà wàní à swìn á con, ndə là tə nə, ba nə zílí Yü-*Siŋu nii. ²⁻³ Á tə wàrì wodiü tətə á dé. Kù mù nə pın, à sùràn tə, à nə swìn á con tə, yì ndə nayıla nə, à nə pın aba. Á yà yì là tə, á nə tə twá á tətə pubuŋa nə. Kù mù nə pın, də zèn mama, á tə wàrì kù á dé. Á tətəŋı wa, á tə jə wugwıu də á dı jara də duən. Kù

nətv tə biri də, á mù də ləzoni tə duən tə, ba nə twá ba tətə pubuŋa nə, yi nədv. Yá á də tuŋa yìèn tə, ba nə tuŋa tia yuu. ⁴ Kù twá də á liù don nə yáá swìn, də v mù wulə Polə kwa. D don də tə wú, v mù wulə Apələsə kwa. Kù nətv tə biri də, á tətəvɛɛ tə yi ndə ləzoni tə, ba nə twá ba tətə pubuŋa nə.

⁵ Cígá mama, Apələsə nə yi wàà? Sə à mù Polə nə yi wàà? Nə yi Yü tütònà mùú. Yü twá də nəba, v ma van aba, v pa á kə á waa v nə. Yüu-Tiu pɪn diàn nə liù mama nə, sə v ma tvn tətəvɛɛ tə, v nə mɛ, sə v tvn. ⁶ Kù yi ndə à mù Polə nə cwɛn tìú nə, Apələsə də ma gərə nía kù dèh nə, yá Yü dàh nə pɪn kù bori. ⁷ Kù mù nə pɪn, nə mɛ, sə nə lwarɪ də, liù tə, v nə cwɛn tìú tə, də liù tə, v nə gərə nía tə kù dèh nə, ba mù mɛ yi tətə. Yü cɪcɪ nə jə dun, v nə pɪn tìú tə bori tə yɪrɪ. ⁸ Liù tə, v nə cwɛn tìú tə, də liù tə, v nə gərə nía tə kù dèh nə, ba mɛ yi won nədv. Yá nə liù mama wá na v tətə tətəvɛɛ tə ŋwírán. ⁹ À mù Polə də Apələsə mù yi nə tuŋa də duən Yü tətəvɛɛ tə wa. Á mù yi ndə Yü kára nə, nə à yèé ndə Yü diè nə, v nə lwè.

(Efezə tián 2.20-22; 1 Piyerə 2.4-6)

¹⁰ Yü nə fwa pubwanv à yɪra, sə à tvn à pa wá. Kù yi ndə à nə dɪga diè dèh, ndə dèlwèré nə, v nə jə wubɔŋa. Yá liù don də kùú twi, v lwà ka bérɪ tə. Liù mama dàh nə mɛ, sə n cì n tiàn nə də lwiu tə yiri tə, v nə lwè ka yuu wa. ¹¹ Kù mù yɪrɪ nə, liù don mama kùú wàrɪ dèh don v tuŋə, də kù nə tà Zwezi-*Kərisə, v nə dí yáá v wulə lá. ¹² Lià duən wá ja síán, nə à yèé cɪnɪa,

nø à yèé kapana wárá, tē səbiu nə dáá zənzən, ba ma lwè ku béré tē. Ba duən də wá ja dæ, nə à yèé gakuru, nə à yèé sısıran, ba ma lwè ku béré tē. ¹³ Dıın tē, Yu nə wá bürı ləzoni tē bürá, liù mama tutuı wá nan poni nə. Yá Yu dän wá pa liù mama tutuı twá mən tē wa, sə tē bırı won tē, ku nə yi. ¹⁴ Liù tē, v tutuı tē nə wá mən dí, Yu wá ıwın ku tíú təntə. ¹⁵ Liù tē, v tutuı tē nə dí mən, ku tíú wá kwın v ıwırán tē nə. Yu wá jon v tətə mù, ku dän nə wá yà ndə v twá mən wa.

(1 Korentø tián 6.15-20)

¹⁶ Á yèé zəni də, á yi ndə Yu *diè nə, Yu-Sııu tē ga wulə á waa tē wa. ¹⁷ Də liù nə cùgù Yu diè təntə, Yu də wá cùgù ku tíú. Ku diè təntə yi diè, ku nə yi Yu nyıən, á mù ga nə yi ku diè təntə.

¹⁸ Liù mama dän ká ıııarı v tián. Də á wa liù nə buıa də, v mù jə tia yuu ləzoni wubııa, ku tíú mē, sə v jı ndə ləyərı nə ba con, sə v cígá ma ya wubııııən. ¹⁹ Á swın ku nətı, sə à ma bırı də, tia yuu ləzoni wubııa yi ləyərı Yu yáá con. Yá ku nə púpúnı Yu sagı tē wa, ku wú:

«D wá ja wubııa tián tē ba tətə yía swıan tē wá».

²⁰ Ku tē swın ku súrı lá, ku wú:

«Yu yèé yənu tián tē pubııa tē nə yi nətı. D yèé də, ka yi tutı».

²¹ Won tē mama dän yi á mù nyıən. Ku mù nə pıı, liù mama dän ká tı ləzwənə, v ma fwa fwıə.

²² Tē mama míámıán yi á mù nyıən. Á mù Polə,

də Apolōsə, də Sefasə*, də luv tə, də mu tə, də tian, də síún mánǵá kv tə wiən tə, də mánǵá tə, kv nə wá bà wiən tə, tə mama míámíán yí á mù nyiən. ²³ Yá á tətə yí Zwezi-Kərisə nyiən, Zwezi-Kərisə də ga yí Yú nyiən.

4

Zwezi-Kərisə tütònà tə yoo

(1 Korentø tián 3.5-9; Romə tián 14.10-12)

¹ Lià tə dǎn mə, sə ba jələ nəba ndə Zwezi-Kərisə tütònà nə, ba nə ywǎǵá v tutuŋi tə yuu, sə nə tun də v cíǵá tə, kv yà nə sèǵè. ² Də ba nə pɪn tutuŋi liù nə, sə v ywǎn kv yuu won tə, ba nə pià, sə v fwa, kv mù nə yí, sə v tun kv tutuŋi təntə də pùé nədu. ³ Də kv nə yí à mù Polə con nə, á nə swə, sə á buri à bura də, kv ba nə yí. Nə à yèé ləzoni tə, ba nə buri bura nə swə, ba buri à bura də, kv ba nə yí. À tətə ga ba à tián bura buri. ⁴ Kv pià kv biri də, yoo tələ à pubuŋa wa. Kv nətu tə dǎn nə ba biri də, à wá jì cíǵá tíú Yú yáá con. *Yuu-Tiu nə wáà à bura v buri. ⁵ Kv mù nə pɪn, á dǎnà ká buri liù mama bura v tutuŋi yuu wa, də kv mánǵá tə wá yí. Á dǎnà də Yú-Tiu piì v twi. D mù nə wá li wiən tə mama, tə nə sèǵè, yikunu wa, v kə poni wa. Kv tə ləzoni tə nə buŋa ba waa con, v wá li kv v biri. Kv diun təntə nə, Yú wá bu liù mama nə, v tutuŋi tə yiri, v nə fwa.

⁶ À nubia-ba, à swin kv nətu tə à mù də Apolōsə yuu wa, sə kv wǎnǵá kv pa aba kwìè.

* **3:22** 3.22 Sefasə ja yiri don, ba nə boŋə Piyerə.

À pìà, sə á twá də nəba, á ma sèe ku tə, ku nə púpúní tə cici nii. Sə á liù mama dàn ká tì liù, ɔ zigi ɔ yira, ɔ ma fwa fwiə, á ga muɲə liù don.
 7 Won mama təló, ku nə biri də, n dwə n duən tə. Won tə mama n nə jə, ku yi Yu nə pɪn ku mù. Də ku nə yi, Yu nə pɪn mú tə wiən təntə mama, bèeèe nə pɪn, n ma pɪn dun n tiàn nə, ndə ku tà Yu nə pɪn mú tə?

(2 Korentə tián 6.4-10; Filipə tián 2.19-22)

8 Awo, á buɲa də, á manwarɪ á jə wiən tə mama, yá won mama wà aba mùrì. Á manwarɪ á jì jìjə tián Yu cwəɲə tə wa. Á manwarɪ á yi pèegá, yá nə mù ga tà pèegá. Ku yà yi yozəɲu, də cígá mama, á nə ya pèegá Yu yáá con, sə nə də twá á dwanɪ nə, nə dé ku pàrì təntə. 9 À buɲa də, nə mù jigə mumun lià lɔɔ mama wa, də *malike yáá con, də ləzoni yáá con. Ku mù nə pɪn, à buɲa də, Yu ken nə mù lià tə, nə nə yi Zwezi-Kərisə *tuntɔna tə, lià tə mama kwa wa. Nə yi ndə lià tə nə, bərə nə jin nəba, ba nə mɛ, sə ba cùgù nəba. 10 Nə mù yi ləyərən Zwezi-Kərisə yiri, yá á mù yi yənu tián Zwezi-Kərisə yoo wa. Nə mù yi labwana, yá á mù yi diàn tián. Lià pɪn dun á mù nə, yá ba ba dun pɪn nə mù nə. 11 Də zən mama, nə mù yi niən də nanyɔnɪ nə jə nəba. Nə mù nə ba gànù də jə, lià də ga mà nəba, nə twá lá nə nə ywaɲa. 12 Nə yáá tun jìàn tutɔnan, nə yira cɛ zəni. Ba nə twɪn nəba, nə tə yáá lòrì Yu, sə ɔ fwa zəni ku tián yuu wa. Ba nə fɪfɪn nəba, nə yáá píní ku nə wɛɛ con. 13 Də ba nə dí tɪjaɲa, ba kə nə nii nə, ku yi nə yáá zùrì ba bɛanɪ, sə nə pìi

nə kə duən yuu. Llà tə, ba nə yi luv nə kəni cwəŋə nə mù yáá con, nə yi là tə, ba wεε nə nan nəba, nə yi ndə ywərən nə, ba nə yáá lwé pùré yuu wa. Halt, ku ja bà ku yí zèn.

14 Ku yi yoo nə, à dí yáá à swìn á con, à tuŋə lá. Á mù nə yi là tə, á nə ya à bia tə, à nə swə. Ku tà à púpúní yìèn tə tə, sə à ma kə cavıra á nə. 15 Də á nə swə, á jə là duən zənzən, ku tián nə bırtı aba Zwezi-Kərisə cwəŋə tə wa, á nyına mù tə yi nədu. Á mù nə yi á nyına Zwezi-Kərisə cwəŋə tə wa. Ku twá də, à mù nə nə dí yáá, à swìn sbywáŋú tə á con, á ma kə á wεε ku nə. 16 Á dān kwè aba, sə á fwa ndə à nə. 17 Ku mù yırı nə, à tuŋa à biswənə Timote, v nə twá *Yuu-Tiu cwəŋə tə də pùé nədu. Á tuŋa wá, sə v bà v pìi v líi aba ku tə, à nə yi Zwezi-Kərisə cwəŋə tə wa. Ku tə, v nə wá kàrì aba, də ku tə, à nə kàrì Kərisə là púlé tə bwálá mama wa, yi nədu.

(2 Korentə tián 10.1-11)

18 Á wa là duən wulə ba fwa fwiə, ndə ku yi à kúu bá pìi à bà á con. 19 Yá də ku nə yi Yuu-Tiu fıra, à wá bà á con síún síún. Májá tə wa, à nə wá yí á con, ku kúu bá ya ba níé sùràn tə nə, à wá lwarı. Á dān wá lwarı, də ba cígá nə jə diàn. 20 Də Yu nə dé pàrì liù yuu wa, Yu diàn tə də tuŋa də wá, ku tà nii sùràn cıci. 21 Bèèè won nə, á dān pìà? Á pìà də, májá tə wa, à nə biàn á con, sə à ja kafıv à bà à ma fırtı aba naaa? Nə à yèé, á pìà də, à nə biàn, sə à bà də sonu də bıcabwanu?

5

*Bacwan wulə Korentə Kərisə là púlí tə wa
(1 Timote 1.19-20; Galasi tián 5.9; Ebərə-
ba 10.22)*

¹ Á nì də, là zənzən swìn á yoo, də á tɔŋa bacwan á pwərə wa. Kɔ bacwan təntə, á nə tɔŋa tə, là tə də tətə, ba nə yèrì Zwezi-*Kərisə, ba tə yìèn təntə tɔŋa ba pwərə wa. Ba swìn də, á wa liù don tì v nyɪna kan, v ma fwa v kan. ² Kɔ yoo təntə yà mɛ, sə kɔ ya pucvɪ, kɔ pa aba. Yá də kɔ nətɔ tə mama, kɔ tə yɪ fwìə nə jə aba. Kɔ yà mɛ, sə á dɪŋɪ kɔ bɛɛ təntə, v nə tɔŋ kɔ yolwan təntə, á lɪ á tətəŋi wa. ³ Á mù tətə təlɛ də aba, yá à pubɔŋa wa, à wulə də aba kɔ yoo tə wa. Kɔ mù nə pɪn, à mù dí yáá à bùrì kɔ bɛɛ təntə yolwan tə bùrà, ndə kɔ ya à wulə də aba. ⁴ *Yuu-Tiu Zwezi yuu yɪrɪ, à swìn á con, sə á lwarɪ, kɔ tə, á nə mɛ, sə á fwa. Kɔ mɛ, sə á jèñ duən yáá nə, sə kɔ bɛɛ təntə bùrà ma bùrì. À pubɔŋa tə wá yà də aba. Yuu-Tiu Zwezi diàn tə də wá yà nə tətəŋi wa. ⁵ Kɔ máná təntə, á nə kun duən nə nətɔ tə, sə á dàñ dɪŋɪ kɔ bɛɛ təntə, á lɪ á púlí tə wa, sə v va v ya də *Sɪtana. Sɪtana wá cùgù v yɪra tə, sə Yɪ ga jon v jèré tə, dɪn tə nə, Yuu-Tiu Zwezi nə wá pìí v bà, v bùrì ləzoni tə bùrà.

⁶ Kɔ ba ziən, sə á tì kɔ, á ma fwa fwìə. Á yèé də, ba nə pìà, ba fwa dipen, kɔ yɪ sabwarɪ mancɪn nə, ba yáá ma pa dipen mun tə mama zàn tə ɲùní.

⁷ Zwezi-Kərisə dàñ nə yɪ nə *Pakə cànà tə *pabiə, ba nə gua nə cuna yɪrɪ. Á dàñ mɛ, sə á

li cuna nədwarə tə, tə nə yi ndə sabwarı nə, á tətəŋi wa. Sə ku pa á ya ndə dipen mun nədun nə, sabwarı nə wà ku wa ken. ⁸ Ku mù nə pın, nə me, sə nə dé cànà təntə də dipen tə, ku wa nə ba sabwarı nədwan jə. Nə dān duŋa ku tə, ku nə yi cuna də wuləŋu yìen tə, sə nə dān ga ya là tə, nə bicanı nə yi nəpwənə, ba nə yi cígá là.

(Zwidə 22-23)

⁹ Á sagı tə, à nə púpúní á nə tə, à swìn ku wa də, á mù də là tə, ba nə pəni duən vee vee tə dān ká jəŋ duən nə. ¹⁰ Də à nə swìn ku nətə, ku tà là tə, ba nə tà Kərisə là tə nə, à swìn. Ba mù yi là tə, ba nə pəni duən vee vee, ba duən yi là tə, là wiən nə jə yimən tə pa ba, ba duən yi là tə, ba nə vırı là wiən də diàn, ba duən yi là tə, ba nə pın dun woŋwanan tə nə, ba ga dugu Yu vān nə. Də liù nə ba pìà, sə v ya də ku là təntə, ku tíú yi v me, sə v nan luw wa míámíán. ¹¹ Ku tə, à nə púpúní tə, ku tà nətə. Ku yi à púpúní ku á mù là tə nə, á nə yi nubia Kərisə yırı. Də liù nə wú, v yi á nubiu, yá ku tíú tə ga pəni là vee vee, nə à yèé là wiən yimən nə jə wá, nə à yèé v nə pın dun woŋwanan nə, v ga duga Yu vān nə, nə à yèé v nə twın là, nə à yèé v nə nywìn swana v tətəli, nə à yèé v vırı là wiən də diàn, á dānà ká jəŋ də ku tíú. Á mù də ku tíú dānà ká dé wodiu tətə də duən. ¹² Á mù Kərisə là tə bərə yoo nə ywəŋá nə. Là tə, ba nə tà Kərisə là tə bərə yoo ba nə ywəŋá. Yá ku yi á də nə me, sə á bürì á púlí tə bərə. ¹³ Yu nə wá bürì là tə, ba nə tà Kərisə là tə,

bùrà. Á dɪŋa liù tɛ, ɐ nɛ tɪŋa lwanɪ tɛ, á tɛtɛŋi wa, á li.

6

*Kərisə lià bùrà nɛ mɛ, sɛ kv ya nɛtv
(Zwakə 4.1; Matie 5.23-24; Romə tián
12.17-18; Efezə tián 5.3-8)*

¹ Də á púlí tɛ wa, liù nɛ yèé liù don yoo, ɐ nɛ pià, sɛ ba bùrì kv bùrà, kv twá nɛtɛ ɐ ma pií ɐ ja kv, ɐ vɛli ɐ swìn lià tɛ nɛ bùrì bùrà tɛ con, ba nɛ tà *Kərisə lià tɛ? Kv mɛ, sɛ ɐ swìn kv lià tɛ cɪcɪ yáá con, ba nɛ yɪ Kərisə nɛ ti, sɛ ba mù nɛ bùrì kv bùrà. ² Á yèé dɛ, kv ya lià tɛ, ba nɛ yɪ Kərisə nɛ ti, nɛ wá bùrì lià tɛ mama, ba nɛ yɪ luv nɛ ti, ba bùrà. Yá cígá mama dɛ á nɛ mɛ, sɛ á bùrì lià tɛ, ba nɛ yɪ luv nɛ ti, ba bùrà, bɛɛɛ nɛ pɪn á wà mɛ, sɛ á bùrì yobii tɛ tɛ bùrà? ³ Á yèrì dɛ, nɛ mù nɛ wá bùrì *malɪkɛ tɛ dɛ tɛtɛ bùrà naaa? Kv nɛ yɪ nɛtv, dɛ nɛ nɛ wá bùrì malɪkɛ bùrà, kv mɛ, sɛ nɛ bùrì tia kv tɛ yuu yìèn tɛ bùrà. ⁴ Á dàń nɛ jɛ yoo kv nɛ mɛ, sɛ kv swìn, kv yɪ nɛtɛ á ma pií á ja kv, á vɛli á pɪn lià tɛ nɛ, ba nɛ ba funɛ jɛ Kərisə lià púlí tɛ wa, sɛ ba mù nɛ li kv yoo tɛntɛ yáá? ⁵ Kv yoo tɛntɛ yɪ á cavira yoo nɛ, à swìn. Liù nɛdv mama tà nɛ tɛlé á mù Kərisə lià púlí tɛ wa, kv tíú wubɪŋa nɛ yí, sɛ ɐ wàní ɐ bùrì bùrà á mù lià tɛ, á nɛ yɪ nubia Kərisə yɪrɪ, pwərə wa naaa? ⁶ Á wa liù don yáá pií ɐ ja ɐ nubiu yoo ɐ ja va, ɐ swìn lià tɛ con, ba nɛ tà Kərisə lià. ⁷ Də yìèn nɛ wulə á tɛtɛŋi wa, liù don nɛ wá bùrì tɛ bùrà, kv nɛtv tɛ bɪrɪ dɛ, á ga tɛ nɛ. Də liù nɛ tun kunkun

yoo á yira, bèèè nè pɪn á ma wàrì ku á píní? Bèèè nè pɪn, á ma wàrì á píní á pɪn v ɲwìn aba? ⁸ Á mù tətə dān nè pìí á tɔɲa kunkun yìèn də á ɲwìn á nubɪa tə duən tətə. ⁹ Á yèé də, là tə, ba nè tɔɲa kunkun yìèn tə, ba bá twá ba ya Yɪ pàrì tə wa. Á dānà ká ɠɪɠarɪ á tìàn, á lwara də, là tə, ba nè pəni duən vɛ vɛ tə, də ba tə, ba nè pɪn dun wɔɲwanan nè, ba ga dɔga Yɪ vān nè, də ba tə, ba nè cwàrì, də bara tə, ba nè ba kan pìà, ba ga pìà bara duən, ba ma fwa ba kana, ¹⁰ də ba tə, ba nè yɪ ɲwɪna, də ba tə, là wiən yimən nè jə ba, də ba tə, ba nè nywìn swana ba tətəli, də ba tə, ba nè twɪn là, də ba tə, ba nè vɪrɪ là wiən də diàn, ba mù ləzwənlwan təntə mama, bá twá ba ya Yɪ pàrì tə wa. ¹¹ Á wa là duən də yà yɪ ndə là təntə nè, mǎǎ don wa. Yá sún nè, Yɪ sɪn á cɔna tə. D tant aba v tún, sə á ya v mù nyiən. Yɪ twá *Yuu-Tiu Zwezi-Kərisə də v *Siɲu tə, v pa á jì là tə, á yɪ cígá tìàn v yáá con.

*Nətv tə á yira tə nè mɛ, sə tə pa dun Yɪ nè
(1 Tesalonikə tián 4.1-7; 1 Piyerə 1.14-19)*

¹² Á wa là duən swìn də, ba jə cwəɲə, sə ba fwa won mama. Də ku nè swə, ku yɪ cígá, ku dān nè tà wiən tə mama, ba nè fwa nè jə nywarɪ tə pa ba. Á swìn də, á jə cwəɲə, sə á fwa won mama. Yá à mù Polə dān nè ba pìà, sə won mama mìn nè, ku ja à bɪan nè. ¹³ Á swìn də, wodiu yɪ pùé yɪrɪ nè ku wulə, yá pùé də ga yɪ wodiu yɪrɪ ka wulə. Yá dɪn don nè, Yɪ wá pa pùé də wodiu mɛ nyu lá. À mù con nè,

ləzwənə yıra tə mù yà tà Yü fwa kü, sə v ma pèñ là duən vee vee. Yü fwa kü, sə nə jə kü, nə twá *Yuu-Tiu nə. Yá Yuu-Tiu də ga yi yıra tə nyiən. ¹⁴ Yü pií v bwin nə Yuu-Tiu, v li tian wa. Yá v wá bwin nə də, v li tian wa də v diàn tə. ¹⁵ Á yèrì də, *Kərisə là púlí tə nə yi Kərisə yıra tə, yá á liù də mama ga yi Kərisə yıra tə nandav naaa? Kü ziən, sə à tì Kərisə nandav tə don, à pa kacwarv nə naaa? ¹⁶ Abada! Kü tà nətü! Á yèrì də, liù tə, v nə pèñ də kacwarv, v mù də kacwarv tə me jigə won nədv naaa? Kü yi ndə kü nə púpúní Yü sagı tə wa, kü wú: «Ba mù là bələ təntə, ba nə tun kü yoo tə, dān wá jì won nədv». ¹⁷ Yá liù tə, v nə tì v tiàn v marı Yuu-Tiu nə, kü tíú də Yuu-Tiu wá ya siŋu nədv tə wa.

¹⁸ Kü mù yırı nə, á dān duŋa ka cwàrì də duən tə. Cuna tə duən tə, ləzoni nə tuŋa, tə wà marı ba yıra. Yá liù tə, v dān nə cwàrì, cuna tə yi v tuŋa v tətə yıra. ¹⁹ Á yèé də, á yıra tə nə ya Yü-Siŋu tə *diè. D pın kü, sə kü bà, kü ya kü wa. Á yıra tə kúè tà á mù nə ti, kü ya Yü nyiən. ²⁰ Á na zəni də, Yü yè aba də kwənə tə nə dáá v jon. Á dān pian Yü na dun, won tə mama wa, á yıra tə nə tuŋa.

7

Ka swe yoo (*Matie 19.3-12*)

¹ Síún nə, à dān pìà, sə à le á bwiə tə, á nə bwe nə á sagı tə wa: Kü ba ziən, sə beə pèñ də kan naaa? ² À dān nə kúè pií, à bún là tə

nə pəni duən vɛɛ vɛɛ tə yoo, à na də, kɔ ziən, sə bɛɛ mama swe v kan, sə kan də mama swe v barı nə. ³ Kanbarı tə mɛ, sə v tun kanbarı tutuŋı v kan tə yıra ba sapaa wa. Kan tə də mɛ, sə v tun kan tutuŋı v barı tə yıra ba sapaa wa. ⁴ Kan tə kúv ba v tətə yıra tə ti, kɔ dǎn ya v barı nə ti v tətə yıra tə. Bɛɛ tə də kúv ba v tətə yıra tə ti, kɔ dǎn ya v kan nə ti v yıra tə. ⁵ Yá bɛɛ də v kan wà mɛ, sə ba kán ba tìàn nə duən con. Də á nə pìà, sə á pwèe də duən tətə, kɔ mɛ, sə kɔ ya mǎŋá mancın wa, kɔ twá də nimarv nə, sə á ma jɔn Yı. Kɔ mǎŋá mancın tə nə lɛ, sə á pìí á va duən con. Kɔ nə tà nɛv, á bá wǎnı á ja á tìàn sɛnbwen. Yá *Sıtana wá twá kɔ nə, v dédén, sə v yugə aba, v pa á tun yokokwıɔn.

⁶ Kɔ tə à nə swın nɛtɛn, kɔ tà ndə nii nə à pın aba, kan də v barı ka pwèe duən nə yoo wa. Kɔ yı yoo tə, à nə na, də á nə fwa kɔ, kɔ tà yolwan. ⁷ Yı pın tarpınan yirə yirə liù də mama nə, sə n ma tun v tutuŋı tə. Ba duən con, ba də nyiən yı kɔ cıci, ba duən də con, ba də nyiən yı kɔ cıci. À mù Polə con nə, à mù yà swə, sə lià tə mama yà ndə à nə, ba dǎnà ká swe.

⁸ À dǎn swın bara tə con, ba nə wà swe, də kadənə tə con də, kɔ ziən, sə ba ya lá nɛv ndə à nə. ⁹ Də ba nə wàri ba tìàn ba pínı, sə ba swe. Kɔ ziən, də á nə swe duən, kɔ donı, də á nə yá á pa kɔ fira dé aba.

¹⁰ À dǎn pìà, sə à swın ba tə ba swe tə con. Kɔ tà à mù nə pın nii kɔ tə. Kɔ ya *Yuu-Tiu nə pın kɔ. Kan tə, v nə swe, v dǎn ká nan v barı

con. ¹¹ Də v nə nan v barı tə con də, sə v kùdàn ká pìi v swe barı don. Nə à yèé də v nə pìà barı, sə v pìi v va v barı tə con, sə v pa ba kə duən yuu. Sə kanbarı tə də dòn ká dıŋı v kan v duŋv.

¹² Sıún nə, à pìà, sə à swìn lià tə duən tə con. Kú ya à mù nə swìn, kú tà Yuu-Tiu nə swìn. Də liù tə, v nə yı á nubiu Kərisə yırı, nə jə kan, v nə tà Kərisə liù, yá kan tə ga swə, sə ba ya duən nə, sə v dòn ká dıŋı wá v duŋv. ¹³ Də kan də nə kùdà ya Kərisə liù, yá v barı tə ga tà Kərisə liù, kú bəe təntə ga swə, sə ba ya duən nə, sə kan tə dòn ká nan v yá wá. ¹⁴ Yı twá də kan tə, v ma tı bəe tə, v nə tà Kərisə liù tə. Yı twá də bəe tə də, v ma tı kan tə, v nə tà Kərisə liù tə. Kú nə tà nətv, á bıa tə, á nə lırvı, wá ya cuna bıa. Yá kú cígá mama wa, ba ya Yı nə tı ba.

¹⁵ Də ba liù tə, v nə tà Kərisə liù tə nə pìà, sə v pwèe də v tə, v nə yı Kərisə liù tə, sə v pwèe də wá. Kú nətv tə wa, kú ba yoo mama jə, kú pa liù tə nə, kú nə yı á nubiu, nə à yèé á nubıa Kərisə yırı, də ba nə pwèe də duən. Yı ya swə, sə á ya duən nə də bıcan sıé. ¹⁶ N mù kan tə, n nə ya Kərisə liù, n wàrì n lwarı, də Yı nə wá twá də mú, v ma jon n barı tə v cuna wa. N mù kanbarı tə də con, n wàrì n lwarı, də Yı nə wá twá də mú, v ma jon n kan tə v cuna wa.

*Nətv tə, n nə yı Yı ma kúrí mú, n tə ya nətv
(Romə tián 6.18-22)*

¹⁷ À pìà, sə à súrı yoo kú tə lá nə. Kú mù nə ya, sə liù mama tı cwəŋə tə *Yuu-Tiu nə kúrí, v

pa wá. Ku mù cwəŋə təntə, ʋ yà nə tì də máŋá tə wa, Yui nə kúrí wá, sə ʋ twá ʋ mù Yui nə. Kərisə là púlé tə mama wa, ku mù nii təntə nə à pɪn ba. ¹⁸ Də Yui nə kúrí bæ, də ʋ yà nə *gwəŋə, sə ku tíú ya lá nətu. Də Yui nə kúrí bæ, də ʋ yà tə wà gwəŋə, sə ku bæ təntə kùbè dān ká gwəŋə. ¹⁹ Də bæ nə gwəŋə, nə à yèè ʋ wà gwəŋə, tə mə ya tutu. Yoo tə, ku nə dé lá, ku mù nə ya ka zílí Yui *nii yìèn. ²⁰ Sə liù mama dān ká lwàń ʋ yiri tə, ʋ nə yi, máŋá tə wa, Yui nə kúrí wá. ²¹ Yui nə kúrí mú, də n nə ya yoŋu, dān ká pa ku yoo yì mú. Yá n dān nə ni cwəŋə, sə n ma tɪni n tián, sə n tì ka, n ma tɪni n tián. ²² Yoŋu tə, Yui-Tiu nə kúrí wá, sə ʋ twá ʋ nə, ku yoŋu tə kùbè tà yoŋu Yui yáá con Yui-Tiu yiri. Mə ku yi nətu ku pa liù tə nə, ʋ də nə ti ʋ tián, yá Yui ga kúrí wá, sə ʋ bà ʋ twá ʋ nə. Ku tíú jigə Zwezi-Kərisə yoŋu. ²³ Yui pìi ʋ yè aba də kwənə tə nə dáá. Á dān ya ʋ mù nyièn. Á kùbè dānà ká pìi á jì ləzoni ywəŋə. ²⁴ Á nubia-ba, sə á liù mama ya Yui yáá con, ndə nətu tə nə, ʋ nə yi máŋá tə wa, Yui nə kúrí wá, ʋ dān ká lwàń.

*Là tə, ba nə wà swe tə yoo
(1 Piyerə 4.7; Ebərə-ba 13.4)*

²⁵ Síún nə, à wá swìn là tə, ba nə wà swe tə yoo. Ku tà *Yui-Tiu nə pɪn nə ku mù nii təntə, ku ya à tətə pubuŋa, à swìn á con. Yui-Tiu nə dəri yinəgə zənzən tə pɪn á mə, sə á pa cígá à sùràn tə nə, à nə yi pùé nədu tíú tə yiri.

²⁶ Á nəŋə ku tə, à nə buŋa də, ku zìèn. Wɔwalu tə yiri, ku nə wulə síún máŋá ku tə

wa, ku zien, sə liù mama ya lá, ndə n nə ya nətɔ. ²⁷ Də n nə jə bwàlú, n nə càrì, sə n swe, dàn ká dɔgu wá. N nə kùè ba bwàlú jə, sə n ya lá nətɔ, n ba bwàlú càrì. ²⁸ N dǎn nə kùè twá ku nətɔ tə wa, n swe kan, n wà cuna fwa. Kacɔn tə də, ɔ tə nə yèrì bæε, nə kùè twá ku nətɔ tə wa, ɔ swe bæε nə, ɔ wà cuna fwa. Lià tə, ba nə swe duən nə, wá na càn zənzən. Yá à mù ya à pià, sə à ma cì á nə. Ku mù yiri nə à swìn, sə á dǎnà ká swe.

²⁹ À nubɔa-ba, à sɔgu tə dǎn nə ya máǰá tə, Yu nə pin nəba, kùè ba dáá. Ku mù yiri nə, ku nə zigɔ síún nə, sə ba tə, ba nə swe tə, dàn ká vwa ba tián ba kana tə nə, ba doni Yu. ³⁰ Ba tə, ba nə kwi tə, sə ba ya, ndə ku tà ba kwi. Ba tə, ba nə jwε, sə ba ya, ndə ku tà ba jwε. Ba tə, ba nə yè wiən, sə ba də ya, ndə ba ba won jə. ³¹ Sə ba tə, ba nə tɔɲa lɔɔ tutɔnan tə, sə ba ya, ndə ba ba lɔɔ tutɔnan tɔɲa. Tɔa ka tə yuu wiən tə, nə nə na, tə wá ε. ³² À ba pià, sə twara jə aba. Liù tə, ɔ nə wà swe, ku ya Yuu-Tiu tutɔɲi tə twara nə yàá jə wá, də nətɔ tə, ɔ nə wá ma poli Yuu-Tiu pùé nə. ³³ Kanbarɔ mù ya lɔɔ wiən twara nə ja wá. D pià, sə ɔ poli ɔ kan tə pùé nə, ɔ mù nə kùè pià, sə ɔ poli Yu də pùé nə. ³⁴ D pubɔɲa tə dǎn yàá jì bələ. Mə ku ya nətɔ kana tə də con. Kan tə, ɔ nə ba barɔ ja, də kacɔn tə, ɔ tə nə yèrì bæε, Yuu-Tiu tutɔɲi tə cɔcɔ twara nə ja ba. Ba pià, sə ba ya Yu nyiən, sə Yu nə tɔnɔ ba yira tə də ba pubɔɲa mama. Yá kan tə, ɔ nə swe barɔ nə, ɔ də ya lɔɔ wiən twara nə jə wá. D pià nətɔ tə, ɔ nə wá twá, ɔ

ma poli v barı pùé nə.

³⁵ À nə swìn tə yìèn təntə á con, ku ya, sə tə san aba. Ku tà à pìà, sə à kə aba yoo wa. Ku ya à pìà, sə á tun won mama, ndə ku nə me, sə ku tun nətɔ Yu cwəŋə tə wa. Sə vaŋɔ dən ká ya lá, sə á ma marı Yuu-Tiu yira.

³⁶ À dən pìà, sə à swìn bɛɛ nə jə v kacun v nə pìà, sə v swe yoo. Dɪn don, bɛɛ də v bwàlú wáá ba buŋa də, ku me, sə ba yá ba bwàlí tə. Yá ku kwa nə, ku wáá ku pɪn bɛɛ tə ga buŋa də, ku ya yolwan, v tun v bwàlú tə yira. D fira nə jə wá zənzən, ku pa v wàrì v píní, v nə na də v pìà, sə v swe v bwàlú tə, sə ba swe duən nə. Də ɓa nə swe duən nə ku tà cuna. ³⁷ Yá bɛɛ tə wáá v kúrí v tì də, v bá swe v bwàlú tə də v waa mama. Də v nə jə v tián diən, də v nə ken v pubuŋa wa, də v mù də v bwàlú tə bá pèñ duən nə, ku zìən, v nə wà v bwàlú tə swe. ³⁸ Ku yoo tə dən pìà ku swìn də, bɛɛ tə, v nə swe v bwàlú tə fwa yozəŋu. Bɛɛ tə, v də nə ba v bwàlú tə swe, də nə kúv fwa yozəŋu v doni.

³⁹ Kan nə swe barı nə, v barı tə nə wà tɪ, v ba cwəŋə jə, sə v nan v va v swe barı don nə. Yá v barı tə dən nə tɪga, v jə cwəŋə, sə v pìi v swe barı don nə, v nə swə. Ku me, sə barı təntə də ya Kərisə liù. ⁴⁰ À mù pubuŋa wa, à yà wá swìn də, kan tə nə wà pìi v swe, v yà wá ja pupwən, v doni v nə pìi v swe. Mə à mù pubuŋa nə nətɔ, yá à də ga yèé də, Yu-*Siŋu tə wulə də nə.

8

Joŋi diè nàŋú diŋə yoo

(1 Korentə tián 10.19-33; Romə tián 14.13-23)

¹ Síun nə, à dàń pià, sə à swìn nàŋá tə, ba nə ma fwa *joŋi, ba pɪn woŋwanu nə yuu wa. Ku yɪ cígá, á swìn, á wú: «Nə mama yèé cígá tə». Yá ku yənu təntə nə yàá kə nəba fwɪə wa. Yá sonu mù yɪ ku yàá pa, nə vəli yàá wuuu, Yɪ tutuŋi tə wa. ² Də liù nə fwa fwɪə ɐ bɪri də, ɐ mù yèé yìèn, ku nətu tə nə bɪri də, ɐ tə yèri yìèn tə, ndə ku nə mɛ nətu. ³ Ku mù nə pɪn, liù tə, ɐ nə swə Yɪ, Yɪ də yèé ku tíú yoo.

⁴ Ku nə yɪ nàŋú tə, ba nə ma fwa joŋi, ba pɪn woŋwanu nə yoo wa, nə mama yèé də, lɐw woŋwanu ya tutu. Nə ga yèé də, Yɪ cɪcɪ nə ba don jə. ⁵ Lià duən bɪri də, wiən wulə lanworu tə wa də tia yuu wa, ba mù nə jùnì, ndə ba yia nə. Ku mù nə bɪri də, lià duən con yia dáá, yun tián də dáá. ⁶ Nə mù yèé də, ku tà cígá. Nə yèé də, Yɪ ya nədu cɪcɪ. Ɖ mù nə ya nə nyɪna. Yá ɐ mù yɪri nə nə wulə. Ɖ mù nə pɪn wiən tə mama wulə. Nə yèé də, *Yuu-Tiu də yɪ nədu cɪcɪ. Ku mù nə yɪ Zwezi-*Kərisə. Wiən tə mama nə twá də wá tə ma wulə. Ɖ mù nə pɪn nə də wulə.

⁷ Lià tə mama pubuŋa tà nədu. Lià duən wulə á pwərə wa, ba nə mì woŋwanan tə zənzən. Ku mù nə pɪn, ku tián təntə nə dí woŋwanu nàŋú, ba waa con ba yàá piì ba buŋa də, woŋwanu tə nə ya ba yɪ. Yá ba kùú ba diàn jə Yɪ cwəŋə tə wa, ku jigə cuna ba waa con.

⁸ Nə mù yèé də, ku tà wodiu nə wá pa nə yí Yü yira. Də nə nə dí ku, ku bá súrí nəba Yü yáá con. Nə nə kúv wà ku dí, ku bá mun nəba Yü yáá con.

⁹ Á dàn nə zurə á yira, də á nə swə á jə cwəŋə, sə á dé won tə mama, á nə pìà. Ku nə tà nətɔ, Kərisə là tə, ba nə ba diàn jə Yü cwəŋə tə wa, wá twá á nə, ba ma dɔɔ Yü cwəŋə tə ba jén. ¹⁰ À wá man ku nətɔ tə nɛɛ, à bɪrɪ aba. Də liù tə, v tə nə yèrì Yü cwəŋə tə wa yìèn tɛntə, v nə nɪ n mù liù tə, n nə yèé Yü cígá tə də, n jèñ woŋwanan diè wa, n dé tə nàŋú, v də wá búb də, v də wáá ku v dé. ¹¹ Yá ku dàn wá twá, də n mù liù tə, n nə yèé Yü cígá tə, liù tə don tə, v nə yɪ n nubiu Kərisə yiri, v nə yèrì tə ma jén, Zwezi-Kərisə ga tɪ v də yiri. ¹² Də n nə fwa nətɔ, ku yɪ cuna nə, n fwa n nubia tə yira, ba nə ba diàn jə Yü cwəŋə tə wa. Ku yɪ n gugurə ba pubuŋa tə, ku cuna tə ga yɪ tə tégé n mù də Zwezi-Kərisə pwərə wa. ¹³ Ku mù yiri nə, də à nə wá dé woŋwanɔ nàŋú, à nubiu don ga twá ku nə, v jén Yü cwəŋə tə wa, à kúv bá dé woŋwanɔ nàŋú míámíán, sə ku pɪn nubiu don jén Yü cwəŋə tə wa.

9

Polə ba ŋwírán pìà Yü tɔtɔŋɪ tə wa

(Likə 10.7; Galasi tián 6.6; 1 Timote 5.17-18; 2 Korentə tián 11.7-12; Tɔtvnan 20.34-35)

¹ Á tətə yèé də, à mù Polə yɪ liù tə, à nə tɪ à tiàn. Á yèé də, à yɪ Zwezi-*Kərisə *tɔntɔnɔ. À cígá nɪ nə *Yuu-Tiu Zwezi à yii wa. Cígá mama,

à tɔtɔŋɪ tɛ, à nɛ tɔn à pa Yuu-Tiu nɛ tɛ, nɛ pɪn á ma yɪ Yuu-Tiu Kərisə lià. ² Də lià duən nɛ swə ba swìn də, à tà Zwezi-Kərisə tɔntɔnɔ, á mù yèé də, à yɪ Zwezi-Kərisə tɔntɔnɔ. Á mù yɪ mɪmɪnɔ, kɔ nɛ bɪrɪ də, à yɪ Yuu-Tiu tɔntɔnɔ.

³ Mə kɔ mù yoo tɛntɛ à yàá ma le lià tɛ, ba nɛ cəgə nɛ tɛ. ⁴ Cígá mama à jə cwəŋə, sɛ à jon à nii wodiu də won tɛ, à nɛ wá nyɔ á con, à tɔtɔŋɪ tɛ yɪrɪ. ⁵ Cígá mama à jə cwəŋə, sɛ à də swe kan lià tɛ wa, ba nɛ yɪ à nubɪa Kərisə yɪrɪ. Yá à də də à kan tɛ yà wàá nɛ twá tɪan tɛ wa nɛ vɛli, ndə Yuu-Tiu nubɪa tɛ, də v tɔntɔna tɛ duən nɛ, ndə Sefasə* nɛ. ⁶ Cígá mama, kɔ yɪ à mù də Barənasə cɪcɪ nɛ ba cwəŋə jə, sɛ nɛ ma nɪ nɛ nii wodiu, də kɔ nɛ tà nɛ tɔn də nɛ jìàn naaa? ⁷ Á tɛ nɪ pamanɔ, də ba nɛ ba v nii nɛ lɪ, v ga vɛlə kùù naaa? Á tɛ nɪ valɔ, də v varɪ kárá, ka wiən bɪ, yá v ga ba tori jə ka wiən tɛ tɛ wa naaa? Á tɛ nɪ liù, də v cì váná nɛ, yá v ga ba tɛ yɪla kaŋa v nywìn naaa? ⁸⁻⁹ Kɔ tà ləzoni pubɔŋa nɛ, à ma swìn yìèn tɛntɛ. Yɪ *nii tɛ, v nɛ pɪn *Moyizə nɛ saga tɛ də tɛtɛ swìn tɛ yìèn tɛntɛ. Kɔ púpúní saga tɛntɛ wa də, mánjá tɛ wa, n nɛ jə nav, n ma tɔŋa n fɔɔ, kɔ wà mɛ, sɛ n vwa kɔ nii nɛ, kɔ dàn ká dɪŋɪ wobɪa tɛ. Kɔ sugv tɛntɛ pià kɔ bɪrɪ də, nɪan yoo yì Yɪ naaa? ¹⁰ Kɔ sugv tɛntɛ tà nɛ mù Zwezi-Kərisə tɔntɔna tɛ yɪrɪ nɛ, Yɪ swìn kɔ naaa? Awo, kɔ ya nɛ mù yɪrɪ nɛ, Yɪ swìn kɔ. Liù nɛ varɪ kárá, v yàá jə yala də, v wá na v tori ka wodiu tɛ wa.

* **9:5** 9.5 Sefasə ja yɪrɪ don, ba nɛ boŋə Piyerə.

Liù nè cèrì muna, v də yàá jə yala də, v wá dé tə wodiu. ¹¹ Nə mù nè ken Yui sugu tə á pubuŋa wa, ndə ba nə dùè wodwii kára wa. Á buŋa də, ku yà wà me, sə á mù nè li nè nii nè naaa? ¹² Də lià duən nə joŋə ba nii wodiu á jìàn wa, nə mù yà nə me, sə nə na nə nii wodiu á con, nə doni ku tìán tə. Nə mù ga wà aba lòrì, sə á ŋwín nəba won mama wa. Yá nə yà me, sə nə pa á ŋwín nəba. Nə sèe nə dé càn tə mama, sə nə dàn ká fwa won, ku nə wá cì á nə, sə á nì Zwezi-Kərisə suywánú tə. ¹³ Á yèé də, lià tə, ba nə tuŋa Zwifə-ba Yui *diè tə wa, ba nii wodiu naŋa tutuŋi tə wa, ba nə tuŋa. Á ma kúè yèé də, Yui *joŋwana tə, ba nə gwi vana tə, də yàá li ba tori *joŋi tə nàŋú tə wa. ¹⁴ Nə də con nə, mə ku yi nətə. Yuu-Tiu də pɪn nii, sə lià tə, ba nə swìn v suywánú tə, na ba nii wodiu ku tutuŋi təntə wa.

¹⁵ Də ku nətə tə mama, à mù wà aba lòrì, sə á li à nii nə. À nə púpúní ku nətə tə, ku tà à wú á dàn pɪan won bà, ku pa nə. À ba pià, sə liù mun à dun tə, à nə jə tə. À nə tɪga, ku kukwa, də à nə bwe won bwie á con. ¹⁶ Won tə, ku nə pa à swìn suywánú tə, ku tà won tə à nə wàá à ma fwa fwie. Ku ya Yui tətə nə kálí nə, sə à swìn suywánú tə. Də à nə wà ku swìn, ku ya càn nə wá yí nə. ¹⁷ Yui suywánú tə ya à yuu zli Yui pɪn nə. Ku tà à tətə nə kúrí ku à tìàn nə. Ku yà nə yi à tətə nə kúrí à tì, sə à swìn Yui suywánú tə, à yà wá jon ŋwírán ku yira. ¹⁸ Bèèèe dàŋ nə yi à ŋwírán ku tutuŋi təntə wa? À ŋwírán nə ya,

sə à swìn suywánú tə, à pa lià nə tutv. À dàn ká bwe ba à ɣwírán bwiə.

19 À mù Polə ti à tián liù mama yáá con. Yá à tətə nə ti à tián, à ma fwa lià tə mama yoŋu. À fwa nətv, sə à twá kv nə, à van lià zənzən à pa Zwezi nə. 20 Máná tə wa, à də *Zwifə-ba nə wulə duən nə, à yáá lwàń à jì ndə ba nə, sə à ma wàní ba à van à pa Zwezi nə. À yáá fwa kv nətv, yá Yı *nii tə, v nə pın *Moyizə nə tə ga kúv ba dián jə à yuu wa. Də à nə fwa kv, kv yı à pià, sə à van Zwifə-ba Yı nii tə, v nə pın Moyizə nə tə wa, à pa Zwezi nə. 21 À nə kúv wulə lià tə, ba nə yèrì Yı nii tə, v nə pın Moyizə nə pwərə wa, à yáá fwa ndə à də yèrì kv, sə à ma wàní ba à van à pa Zwezi nə. À nə fwa kv nətv tə, kv ba pià kv swìn də, à ba Yı nii tə, v nə pın Moyizə nə zìlí. À zìlí Zwezi-Kərisə nii zəni. Kv yı à fwa kv, sə à ma van lià tə, ba nə ba Yı nii tə, v nə pın Moyizə nə jə, à pa Zwezi nə. 22 À nə kúv wulə də lià tə, ba nə tə ba dián jə Yı cwəŋə tə wa, à yáá jì ndə à də ba dián jə, sə à ma wàní ba à van à pa Zwezi nə. Də lià nə swə, ba yı nətv mama, à yáá jì ndə ba nə, sə à ma wàní à twá yiri mama nə, à ma van ba duən, sə Yı jon ba ba cuna wa. 23 À fwa wiən tə mama Yı suywánú tə yırı, sə à ma wàní tori à na Yı con.

(2 Timote 2.3-6; 4.5-8)

24 Á yəé də, lià nə pià, sə ba dəri dəru, sə ba jon ɣwírán. Ba mama yáá dəri cígá, kv dàn nə ya ba wa liù nədv tə, v nə wá dəri v le ba duən

tə, nə wá na ɲwírán tə. Á dàn kəni diàn, ndə lià tə nə, ba nə dəri tə, sə á də wàní ɲwírán á na. ²⁵ Lià tə mama, ba nə pià, sə ba dəri dəru ba jon won, ba yàá dí yáá ba cì ba tiàn nə də wiən tə, ba nə swə, yá tə ga ba ziən də dəru tə. Ba fwa nətɔ, sə ba ma na jala yupuu dəru tə wa. Yá yupuu təntə ba dání, ku ma kwɪn. Nə mù dəru tə wa, Yɪ wá pa nəba yupuu tə, ku nə bá kwɪn, abada. ²⁶ Ku mù nə piɪ, à mù ma dəri Yɪ nyiən tə wa, sə à yí ku yígúré. À tə yɪ ndə liù tə nə, ɔ nə mà cwàrí. À ba à cwàrí tə mà woru wa. ²⁷ À kəni càn à tətə yɪra tə nə, sə ku pa à wàní à tiàn à ja, sə à mù liù tə, à nə swɪn Yɪ sɔgɔ tə, à bɪrɪ lià nə, Yɪ dàn ká vɪ nə ɔ dɔgɔ.

10

Won tə, Yizərayelə lià tə nə fwa, ku nə kàrì nəba
(Ebərə-ba 3.7-19)

¹ À nubɪa-ba, à mù Polə pià, sə á lií ku tə, ku nə tɔn máɲá tə wa, nə nɪbara*, ba nə wulə *Moyizə kwa, kasɔɔ lanworu tə wa. Bakwan tə yà nə púé ba mama míámíán yuu nə, ba ma vèli. Ba mama nə vèli ba bən mɔnaa nəstɪn tə. ² Ba mama tə yà yɪ ndə ba ləgə ba bakwan tə də mɔnaa tə wa, sə ku pa, Moyizə ya ba yuu tíú. ³ Ba mama dí wodiu tə, ku nə nan Yɪ con.

* **10:1** 10.1 Polə yɪ *Zwifə-ba yoo nə ɔ swɪn. Zwifə-ba tə yà yɪ ywəɲə, ba wulə *Ezwipətə nagwanaa wa. Yɪ ma li ba lá nə, ɔ pa ba twá kasɔɔ lanworu tə wa, ba va *Yizərayelə lɔv nii tə wa.

4 Ba mama nə nyva níá tə, Yü nə pın tə nan pùè tə wa. Kù pùè təntə yà yí Zwezi-**Kərisə*, nə vèli də ba. 5 Yá də kù nətə mama ba wa là zənzən wà Yü pùè poli. Kù mù nə pın, ba tí ba zwe kasɔɔ lanworu tə wa.

6 Kù nətə tə pià kù bırı nəba də, kù ba ziən, sə nə pa nə pùé yokukwınan fira zv nəba, ndə tə fira nə zva ba nətə. 7 Ba wa là duən yà yí woŋwanan nə ba pın dun, ba ga dɔgu Yü vən nə. Kù yà yí, ndə kù nə púpúní Yü sagı tə wa, kù wú:

«Là tə jèń duən yáá nə, ba dé wodiu, ba nyu ba sú. Kù kwa nə, ba zàn, ba wulə ba SE».

8 Ba wa là duən də yà pəni duən vɛɛ vɛɛ. Kù mù nə pın, ba wa là mùrù sapva də batwa (23 000) twá duən, ba tí dun nədú. Nə mù dàn ká cwàri də duən ndə ba nə. 9 Ba wa là duən də pià **Yuu-Tiu* nii nə. Kù mù nə pın, dıŋa tə ma dıŋı ba, tə gu. Nə mù dàn ká pià **Yuu-Tiu* nii nə, ndə ba nə. 10 Ba wa là duən də ŋuŋwın Yü. Kù mù nə pın, Yü **malıka* tə, ka nə cùgà là tə bà, ka gu ba. Á mù dànà ká ŋuŋwın Yü, ndə ba nə. 11 Tə mù yìèn təntə mama fwa ba, sə ba duən twá tə nə, ba ma lwarı. Ba púpúní tə ba tún Yü sagı tə wa, sə tə kàri nə mù là tə, nə nə wulə luv talıka máŋá tə wa.

12 Kù mù yırı nə, liù tə, v nə buŋa də, də v zıga yü nə Yü cwəŋə tə, sə v cì v tián nə, v dàn ká dɔgu Yü cwəŋə tə. 13 Yoo tə mama kù nə dédén aba, sə kù yıgu aba kù pa á tın yokukwıɔn, kù dí yáá kù dédén là duən də. Yü yí pùé nədú tíú, v bá sèe, sə yoo mama, kù

nə dwə á diàn dódén aba, sə kv yigu aba kv pa á tun yokukwun. Yu wá pa aba diàn, sə á ma nan kv wa, kv dàn ká doni aba, sə kv pa á wàní á píní kv.

Á cia á tiàn nə də woŋwanan tə

(2 Korentə tián 6.14-18; 1 Korentə tián 8; Romə tián 14.13-23; Apokalisə 2.14)

¹⁴ Á nubisoni-ba, kv mù nə pın, á dàn duga ka pa dun woŋwanan nə tə míámían. ¹⁵ Á yı à swìn á mù là tə con, á nə jə pubuŋa, sə á tətə lwarı kv tə, à nə swìn tə. ¹⁶ Zwezi-*Kərisə jana tə lwá nə yırı v tian tə wa. Yá diven wùrú zuŋa tə, nə nə yàá bwı Yu nə, də nə nywìn tə yı, sə kv ma bırı də, nə mù də Zwezi-Kərisə jə *nimaru v jana, tə nə lwá tə yırı. Dipen tə, nə nə yàá fv nə tàrì duən, nə dé tə yı, sə kv ma bırı də, nə mù də Zwezi-Kərisə jə nimaru v yıra tə yırı, kv nə cùgù v tian tə wa. ¹⁷ Dipen tə yı nədv, nə mù ga dáá, yá nə ga dé kv dipen nədv təntə. Kv nətə tə bırı də, nə yı ndə won nədv nə.

¹⁸ Á buŋa *Yızərayelə là dwíí tə yoo. Ba là tə, ba nə yàá gwı vana tə Yu *joŋi kúrí tə yuu wa ba pın Yu nə tə, yàá dé nənú tə vən don. Yá kv nətə tə pià kv bırı də, ba mù də Yu marı duən nə. ¹⁹ Kv nətə tə ya à pià à bırı də, woŋwanv tə də kv vanv tə me ba funə jə. ²⁰ Á dàn swìn á con də, kv tə, ba nə yàá gv woŋwanv tə nə, kv ya ba gwı *zinə nə, kv tà Yu nə. Yá à ba pià, sə á mù də zinə marı duən nə. ²¹ Á ba cwəŋə jə, sə á nyu zinə diven wùrú

zɔŋa tɛ, sɛ á tɛ nyɔ *Yuu-Tiu dɛ diven wùrú zɔŋa tɛ. Á ma kúb wàrì wodiú tɛ, ba nɛ pɪn zinɛ nɛ, á dé, sɛ á tɛ dé Yuu-Tiu dɛ wodiú tɛ. ²² Dɛ nɛ nɛ fwa kɪ nɛtɪ, kɪ yɪ nɛ pìà, sɛ Yuu-Tiu wɔgɪwɔ zàn naaa? Á buŋa dɛ, nɛ dɪàn dwɛ wá naaa?

²³ Cwɛŋɛ wulɛ, sɛ ba fwa won mama. Kɪ ya cígá, kɪ dǎn nɛ tà wiɛn tɛ mama, ba nɛ fwa nɛ jɛ nywarɪ tɛ pa aba. Cwɛŋɛ wulɛ, sɛ ba fwa won mama, yá wiɛn tɛ mama dǎn nɛ ba nɛba saŋa, sɛ ba bori Yɪ nyiɛn tɛ wa. ²⁴ Sɛ liù mama dǎn pìà kɪ tɛ, kɪ nɛ saŋa ɪ duɛn tɛ nɛ. ɔ dǎn ká pìà kɪ tɛ, kɪ nɛ saŋa ɪ tɛtɛ nɛ. ²⁵ Á díɛ won tɛ mama, ba nɛ yoli yɛɛ wa, á dǎnà ká bún yoo mama, kɪ yoo wà mɛ, sɛ kɪ zɪ á pubuŋa wa. Á dǎnà ká bwe yoo mama. ²⁶ Kɪ púpúní Yɪ sagɪ tɛ wa, kɪ wú:

«Tɪa dɛ kɪ yuu wiɛn tɛ mɛ yɪ Yuu-Tiu nɛ tɪ kɪ». ²⁷ Dɛ liù nɛ tà Kərisɛ liù, yá ɪ bon aba, sɛ á dé dɛ duɛn, á nɛ vɛli, sɛ á dé kɪ tɛ mama, ba nɛ tún á yáá con. Á dǎnà ká bún yoo mama, kɪ yoo wà mɛ, sɛ kɪ zɪ á pubuŋa wa. Á dǎnà ká bwe yoo mama. ²⁸ Liù dǎn nɛ swìn á con, ɪ wú: «Won kɪ tɛ yɪ ba gua wɔŋwanɪ nɛ», á dǎnà ká dé kɪ liù tɛ yɪrɪ, ɪ nɛ dí yáá ɪ swìn kɪ n con dɛ, kɪ yoo tɛ nɛ wá zɪ ɪ pubuŋa tɛ wa yɪrɪ. ²⁹ Kɪ tɛ, à nɛ swìn yɛbɛ, kɪ tà á tɛtɛ pubuŋa tɛ, nɛ wá gugurɛ tɛ yoo, kɪ ya liù tɛ don tɛ pubuŋa tɛ nɛ wá gugurɛ tɛ yoo. Bɛɛɛ yɪrɪ nɛ liù don pubuŋa dǎn ma mɛ, sɛ kɪ bùrì à bùrà kɪ tɛ yɪrɪ, à nɛ tɪ à tìàn à ma fwa? ³⁰ Á ken Yɪ lèèè à wodiú tɛ yɪrɪ, à nɛ dé. Bɛɛɛ

nə pɪn, lià duən tə cəgə nə, ku wodiɯ tə yɪɹɪ, à nə ken Yɪ lèèèe?

³¹ À sɔgɔ tə dǎn pià, ku bɪɹɪ də, ku nə yɪ á wodiɯ diŋə wa, nə à yèé ku tə, á nə nywɪn, nə à yèé ku tə mama, á nə fwa, á fwa ku, sə á pa Yɪ na dun ku wa. ³² Á dǎnà ká ya lià tə, lià duən nə wá zɪɹɪ á yuu wa ba tɔn cɯna, ku nə yɪ *Zwifə-ba, nə à yèé *Gərəkə-ba, nə à yèé Kərisə lià púlí tə. ³³ À də yɪ à fwa won mama à pià, sə ku poli lià tə mama pwií nə. Ku tə à nə pià, ku tà à cɪcɪ saŋɔ nə à pià. Ku yɪ lià kapɔɹɔ saŋɔ nə à pià, sə Yɪ jon ba ba cɯna wa.

11

¹ À dǎn kwè aba, sə á fwa ndə à nə, ndə à də nə fwa ndə Zwezi-Kərisə nə.

Βεε də kan nə με, sə ba jèh̄n nətɔ Yuu-Tiu yáá con

(1 Koréntə tián 14.40; Efɛzə tián 5.22-24; 1 Timote 2.8-14)

² À bwɪ á nə də, á tə nə líí à lié yoo mama wa, á ga twá à kàrà tə nii nə, ndə à nə kàrà aba nətɔ. ³ À dǎn pià, sə á lwarɪ yoo ku tə. Zwezi-*Kərisə nə wulə βεε mama yuu wa. Βεε də nə wulə ɔ kan yuu wa. Yá Yɪ də nə wulə Zwezi-Kərisə yuu wa. ⁴ Βεε tə mama, ɔ nə jùnà Yɪ, nə à yèé ɔ nə swɪn Yɪ *nii sùràn, ɔ ga pú won ɔ yuu nə, ku yɪ ɔ mun ɔ Yuu-Tiu. ⁵ Kan tə mama, ɔ də nə jùnà Yɪ, nə à yèé ɔ nə swɪn Yɪ nii sùràn won, ga wà ɔ yuu nə pwí, ku yɪ ɔ mun βεε tə, ɔ nə wulə ɔ yuu wa. Yá ku cavɪra tə yɪ,

ndə ba nə pàrí* kan yuu nə. ⁶ Də kan nə wà won v yuu nə pwí, sə v gian v yukòran tə. Də ku nə yi cavira ku pa kan nə, sə v pa ba gian v yukòran, nə à yəó, sə v pa ba pàrí v yuu, v mɛ, sə v pú won ku nə. ⁷ Bɛɛ yi Yu nyinyiga də Yu dun, ku mù nə pɪn, v wà mɛ, sə v pú won v yuu nə. Kan də con, v də yi bɛɛ dun. ⁸ Yu li won bɛɛ yira, v ma fwa kan. Yu wà won li kan yira, v ma fwa bɛɛ. ⁹ Yu wà bɛɛ fwa kan yiri, yá ku ya v fwa kan bɛɛ yiri. ¹⁰ Ku mù nə pɪn, kan mɛ, sə v pú won v yuu nə, sə ku biri də, v jə nii Kərisə lià púlí tə wa, *malike tə yiri.

¹¹ Yuu-Tiu yáá con, kan ba v tián ti, bɛɛ nə ti wá. Bɛɛ də ba v tián ti, kan nə ti wá. ¹² Ndə nətɔ tə, Yu nə li won bɛɛ yira, v ma fwa kan, mə nətɔ nə bɛɛ yi kan nə yáá luri wá. Yá tə mɛ yi tə naŋa də Yu. ¹³ Á tətə buŋa ku, á jén ku ziən, sə kan jɔn Yu, v ga ba won v yuu nə pwí naaa? ¹⁴ Nətɔ tə, Yu nə fwa won mama, tə nə biri də, bɛɛ yukòran nə dara zənzən, ku jə cavira. ¹⁵ Yá ku lwàń, ku ya dun ku pa kan nə, də v yukòran nə dara. Kan mù con nə, Yu pɪn wá yukòran tə, sə tə pú v yuu nə. ¹⁶ Də liù nə ba ku swə, v nə tútùní, nə mù ba yofwamɪn təntə jə. Yu lià púlé tə də ba ku yofwamɪn təntə jə.

Nətɔ tə, nə nə mɛ, sə nə dé Yuu-Tiu nimarv wodi tə
(*Matie 26.26-28; Marəkə 14.22-25; Likə 22.19-20*)

* **11:5** 11.5 Korentə tián con, ku máná təntə wa, də liù nə pàrí kan yuu, ku yi v pià, sə v kə cavira ku kan təntə nə.

17 À nə pɪn nii kʊ tɛ, won tɛ, à nə bá bu á nə kʊ yɪɪ, kʊ mù nə yɪ á nə yàá jèh̄n duən nə Yɪ lìa púlí tɛ wa, kʊ ba aba lwàní, sɛ á jì zɛni. Kʊ yàá kwɛn kʊ cùgà aba. 18 Tɛntɛn yoo, à nɛh̄n dɛ, ba swìn dɛ, á nə jèh̄n duən yàá nə *Kərisɛ lìa púlí tɛ wa, á yàá pwèe púlé púlé dɛ duən. À buɲa dɛ, kʊ vàn don wàá cígá kʊ yanɪ. 19 Kʊ mɛ, sɛ pwɪa cígá ya á tɛtɛɲi wa, sɛ kʊ pa ba lwarɪ lìa tɛ, ba nə twá Zwezi cígá cígá á tɛtɛɲi wa. 20 Kʊ bɪɪ dɛ, á nə yàá jèh̄n duən yàá nə, cígá mama kʊ tà *Yuu-Tiu *nimarʊ wodiʊ tɛ á pià á dé. 21 Á liù mama yàá dí yàá v dé v tɛtɛ wodiʊ. Kʊ mù nə pɪn, niɛn yàá jɛ liù don, yá liù don ga nyʊ, v sú v bubʊnɪ. 22 Kʊ yɪ á ba dii jɛ, á nə wá dé á wodirɛn tɛ lá, dɛ á nywìn á swana tɛ tɛ wa naaa? Kʊ yɪ Yɪ lìa púlí tɛ nə á pià, sɛ á mun. Yá kʊ yɪ cavɪra nə, á kɛni ba tɛ nə, ba nə ba won mama jɛ. Á buɲa dɛ, à wá bu á nə kʊ yoo tɛntɛ yɪɪ naaa? Abada, à bá bu á nə.

23 À mù jon Yuu-Tiu sùràn tɛ, à swìn á con.

Dɪn tɛ, ba nə jɪn Yuu-Tiu Zwezi tɛ, kʊ titɪn nə, v tì dipɛn, 24 v kɛ Yɪ lèeèe kʊ yɪɪ. Kʊ kwa nə, v fʊa fʊa kʊ, v ga swìn, v wú: «Kʊ yɪ à yɪra tɛ nə, á mù yɪɪ. Á dàh̄n fʊa kʊ nɛtʊ tɛ, á ma líí à yoo». 25 Ba nə kùb̄ dí wodiʊ tɛ, v zwèe, v kùb̄ tì divɛn wùrú zʊɲa wa, v ga swìn, v wú: «Divɛn kʊ tɛ wùrú zʊɲa ka tɛ wa nə yɪ à jana tɛ, tɛ nə yɪ Yɪ *nimardʊn tɛ. Á fʊa kʊ nɛtʊ, sɛ á ma líí à yoo, máɲá tɛ wa, á nə wá nyʊ kʊ». 26 Yá máɲá mama, á nə dí dipɛn kʊ

tə, á nə nyva wùrú zuŋa kv tə diven tə, kv yi Yuu-Tiu tian tə yoo nə, á biri wuuu. Á fwa kv nətv tə, kv jə vələ máŋá tə wa, Yuu-Tiu nə wá pìi v bà.

²⁷ Kv mù nə pɪn, liù tə, v nə dí kv dipen tətə, v nə nyva Yuu-Tiu diven tə, yá v ga wà mɛ, sə v fwa kv, bərə wulə kv tíu yuu wa, Yuu-Tiu yira tə də v jana tə yiri. ²⁸ Liù mama dání mɛ, sə v dé yáá v zən v tián, sə v ma dé kv dipen tətə, sə v ma nyv kv diven tətə. ²⁹ Liù tə, v nə dí kv, v nə nyva kv, v ga wà Zwezi yira tə zilí, v tətə nə wá pa Yu kə wá càn wa. ³⁰ Kv mù nə pɪn, labwana də yayiŋa ma dáá zənzən á tətəŋi wa, yá á wa lià duən də ga ti. ³¹ Də nə nə bəri nə tətə bərə nə tián nə, bərə kúv bá ja nəba. ³² Də Yuu-Tiu nə ken càn nə nə, máŋá tə wa, kv yi v pìà, sə v ma li nəba yoo wa. D pìà, sə dun tə nə, v nə wá bəri lià tə mama bərə tə, v dàn ká kə nə mù də lià tə mama, ba nə yi luv nə ti, càn wa. ³³ Á nubia-ba, kv mù yiri, máŋá tə wa, á nə jèé duən yáá, sə á dé Yuu-Tiu nimaru wodiu tə, sə á dián duən. ³⁴ Də niən nə jə á wa liù, sə v dé wodiu v sán nə, sə kv dàn ká pa á jèén duən nə, á ma pa Yu bəri á bərə.

À wá le á yìèn tə duən tə, máŋá tə wa, à nə wá bà á con.

12

Yu tarpivn tə, v nə pɪn Kərisə lià duən nə (Efezə tián 4.6-12; 1 Piyerə 4.10-11; Filipə tián 2.1-4)

1 À nubia-ba, ku nè yí Yü-*Siṅu tarpɩvɩn tɔ yoo wa, à pià, sɛ á nì ku dèñ zèni. 2 Á yèò dɛ, máǵá tɔ wa, á yà nè yèrì Zwezi-*Kərisɛ, wɔŋwanan tɔ, tɔ nii nè ba swìn nè yugə aba, tɔ ga dé diàn á yuu wa, sɛ á pú tɔ kwa á jùnì tɔ. 3 Ku mù yiri nè, à swìn á con dɛ, liù wàrì v swìn dɛ, Zwezi ya *Yuu-Tiu, dɛ ku nè tà Yü-Siṅu tɔ nè biri ku wá. Ku mù nè pɩn, dɛ liù mama wàrì v twá dɛ Yü-Siṅu tɔ, v ma swìn v pɩn Yü cùgà Zwezi.

4 Yü-Siṅu tarpɩvɩn yirɛ yirɛ dáá, yá Yü-Siṅu tɔ yí nɛdɩv ku nè pɩn tɔ. 5 Tùtɩnan yirɛ yirɛ dáá, yá Yuu-Tiu tɔ mù yí nɛdɩv, ba nè tɩŋa tɔ ba pɩn wá. 6 Yìèn yirɛ yirɛ dáá tɔ nè tɩŋa, yá ku yí Yü nɛdɩv tɔ nè pɩn diàn yirɛ yirɛ lià tɔ nè, ba ma tɩŋa tɔ. 7 Yü-Siṅu tɔ yáá biri ku tiàn liù mama nè, sɛ v wàní v san ba duən tɔ nè. 8 Ku mù nè pɩn, Yü-Siṅu nɛdɩv tɔ yáá pa wɔbɩŋa sùràn liù don nè, ku ga pa v don dɛ nè yənu sùràn. 9 Ku mù Yü-Siṅu nɛdɩv tɔ yáá pa liù don nè, sɛ v wàní v kə waa Zwezi nè dɛ cígá cígá. Ku ga pa v don dɛ nè tarpɩnan, tɔ nè zwèe yayiran. 10 Ku mù Yü-Siṅu nɛdɩv tɔ yáá pa liù don nè tarpɩvɩn, sɛ v ma fwa tùtɩnà, tɔ nè biri Yü diàn tɔ. Ku pa v don nè tarpɩvɩn, sɛ v ma jon Yü *nii sùràn v swìn. Ku pa v don nè tarpɩvɩn, sɛ v ma lwarɩ sugɩ tɔ, ku nè yí Yü-Siṅu tɔ sugɩ, dɛ ku tɔ nè yí *zinɛ sùràn. Ku mù Yü-Siṅu nɛdɩv tɔ yáá pa liù don nè tarpɩvɩn, sɛ v swìn sɔyirɛ duən, ku pa v don nè tarpɩvɩn, sɛ v ma gwìn tɔ sɔyirɛ tɔ dèñ. 11 Yü-Siṅu nɛdɩv tɔ tɔtɔ nè tɩŋa tɔ yìèn tɔntɔ mama. Ku mù nè tàrì ku pɩn liù mama

nə, ndə nətə tə nə, ku nə pìà.

Yira nədə də ku nandaran, tə nə dáá

¹² Nə yèé də, yira yi nədə, yá ku ga ja nandaran, tə nə dáá zənzən. Yá nandaran təntə nə dáá nətə mama, tə mù nə ken duən nə, tə ma fwa yira nədə tə. Mə ku ya nətə Zwezi-*Kərisə də con. ¹³ Yá ku dān nə yi *Zwifə-ba, nə à yèé ba tə, ba nə yi də *Gərekə-ba, də ba tə, ba nə yi ywəŋə, nə à yèé ba tə, ba nə tɪ ba tián, ba ləgə nə mama Yu-*Siŋu tə wa, sə nə wānɪ nə ya won nədə. Nə mama súé də Yu-Siŋu nədə tə. ¹⁴ Yira tà nandav nədə nə ku jə, ku yi nandaran, tə nə dáá, nə ku jə. ¹⁵ Də naa yà nə swìn də, ku tà juɪn, ku mù yiri nə, ku tà yira tə nə tɪ ku, ku nətə wàrɪ ku pɪn naa kúù tà yira tə nandav. ¹⁶ Də zuɪn yà nə swìn də, ku tà yii, ku mù yiri nə, ku tà yira tə nə tɪ ku, ku nətə tə wàrɪ ku pɪn ku kúù bá ya yira yira nandav. ¹⁷ Də yira tə mama yà nə yi yii cɪcɪ, ku yà wá fwa nətə, ku ma nì sùràn? Nə à yèé ku yà nə kúù yi zuɪn cɪcɪ, ku yà wá fwa nətə, ku ma nì lwán? ¹⁸ Ku mù nə pɪn, Yu ma kə nandaran tə mama yira wa, ndə ʋ nə pìà nətə. ¹⁹ Yira ya wàrɪ lá ku yanɪ, də ku yà nə yi nandav nədə cɪcɪ. ²⁰ Ku mù yiri nə yira yi nədə, yá ku nandaran ga dáá. ²¹ Yii dān wàrɪ juɪn con ku swìn də, juɪn ba tutuŋɪ jə ku pa ku. Yuu də ma kúù wàrɪ nəɛ con ku swìn də, nəɛ ba tutuŋɪ jə tə pa ku. ²² Nandaran tə tətə, tə nə yi ndə tə ba dīàn jə, tə də jə tutuŋɪ yira tə wa. ²³ Nandaran duən wulə yira tə wa, ba nə buŋa də, tə ba dun jə. Yá ba yàá ywàŋá tə

yoo zəni. Ku mù nə pɪn, nə nandaran tə, tə nə jə cavıra tə, nə yàá ywàṅá tə yoo zəni, nə doni. ²⁴ Yá nə nandaran tə, tə nə ba cavıra jə, tə mù ba pìà, sə nə ywàñ tə yoo nətɔ. Yu ken nandaran tə yirə yirə, sə ku pa nandaran tə, tə nə ba dun ja wàní tə na dun, tə doni tə duən tə. ²⁵ Ku yɪ nətɔ, sə yɪra tə dàn ká pwèe duən nə, sə nandaran tə mama san duən nə. ²⁶ Yá də nandav nə wulə càn wa, sə tə duən tə twá tə ya càn təntə wa. Nandav don nə wulə dun wa, sə tə duən tə də twá tə jwɛ də ku. ²⁷ Á mama míámíán yɪ Zwezi-Kərisə yɪra tə. Yá á liù mama dàn ya yɪra təntə nandav. ²⁸ Yu təntən ɔ kə Zwezi-Kərisə *tɔntɔna tə Kərisə lià púlí tə wa. Bələ nii nə, ɔ ken Yu nii *sùsùná lá. Batwa nii nə, ɔ ken karnyɪna lá. Ku zàn lá, ku pa ba tə, ba nə jə Yu tarpɪɔn, ba ma tɔɲa yomɪlan, tə nə bɪrɪ Yu diàn tə. Ku zàn lá, ku pa ba tə, ba nə zwèe yayɪran tə. Ku zàn lá, ku pa ba tə, ba nə saɲa lià nə. Ku zàn lá, ku pa ba tə, ba nə kəni lià cwəŋə wa. Ku zàn lá, ku pa ba tə, ba nə swìn sɔyirə duən. ²⁹ Ba mama nə tà Zwezi-Kərisə tɔntɔna. Ba mama nə tà Yu nii sùsùná. Ba mama nə tà karnyɪna-ba. Ba mama nə ba yomɪlan tə fwa, tə nə bɪrɪ Yu diàn tə. ³⁰ Ba mama nə ba tarpɪɔn tə, ku nə zwèe yayɪran tə jə. Ba mama nə ba sɔyirə yirə tə swìn. Ba mama nə ba sɔyirə yirə tə dɛñ gwɪn. ³¹ Á kəni á kajaɲa á pìà tarpɪnan, tə nə jə funə tə doni. Yá à dán wá bɪrɪ aba cwəŋə tə, ku nə zɪən ku doni.

13

Sonu yoo

(Matie 22.36-40; Romə tián 13.8-10; 1 Zwan 3.16-19; 4.7-21)

¹ Də à nè swìn ləzoni sùràn də *malıke sùràn tətə, yá à ga ba sonu jə, ku ya tutv. Ku yi ndə luloŋi zəzugu nə, nə à yəé ndə ba nə mà kwán ka zəzəgə nətə. ² À wáá tarpıun à nı, sə à ma swìn Yu nii sùràn. À wáá wubıya à janı à ma lwarı yìèn tə mama, tə nə sègè. À ma kúv wáá yənu yiri mama à janı. À ma kúv wáá à yanı liù tə, à nə keni à waa Yu nə wuuu də cígá cígá, ku pa à wáá à pın pəen fàrí tə bwálá nə tətə. Yá à nə ba sonu jə, à tə ya tutv. ³ À nə kúv swə à tàrì à jıjə tə mama, à pa zıra nə, à nə pın ba surı à yıra tə tətə mən wa, yá à nə ba sonu jə, ku tə ba funə jə ku pa nə.

⁴ Liù nə jə sonu, ku tíú jə pínú, v ga sú də ywánı. Liù nə jə sonu, ku tíú ba liù don nə zıga v wiən yıri. Liù nə jə sonu, ku tíú ba ka bu tián nə jə. Liù nə jə sonu, ku tíú ba fwıə jə. ⁵ Liù nə jə sonu, ku tíú ba cavıra kəni liù don nə. Liù nə jə sonu, ku tíú ba v tətə zəni pià. Liù nə jə sonu, ku tíú ba lıya jə. Liù nə jə sonu, ku tíú ba yolwan tuŋə v bıcan wa. ⁶ Liù nə jə sonu, ku tíú yáá jwə cígá yoo yıri, ku tíú ba pupwən fwa kunkun yìèn yıri. ⁷ Liù nə jə sonu, ku tíú yáá kwen yoo mama v lı v mù də lià tə duən tə pwərə wa. Liù nə jə sonu, ku tíú kəni v waa Yu nə yoo mama wa. Liù nə jə sonu, ku tíú jə yala yoo mama wa. Liù nə jə sonu, ku tíú jə pínú yoo mama wa.

⁸ Ka jon Yu nii sùràn, ka swìn wá zwèe. Suyirə tə duən wá zwèe. Yənu də ga wá jén. Liù nə jə sonu, ku tíú sonu tə bá zwèe, abada. ⁹ Ku nətv tə biri də, ku tà yìèn tə me, nə nə yèé. Yá Yu nii sùràn tə, nə nə jonə nə swìn, ku tà tə me, nə nə wàá nə swìn. ¹⁰ Máná tə wa, Yu nə wá biri nəba won mama nə yi nətv, wiən təntə, nə nə yèé síún nə, wá jén lá.

¹¹ Máná tə wa, à yà nə ya bisımaa, à yà swìn ndə bisımaa nə, à yà buɲa ndə bisımaa nə, à yà nèn yìèn tə dèñ ndə bisımaa nə. Máná tə wa, à dāñ nə jigə beε, à dugv bisımaa yìèn təntə. ¹² Síún nə, ku yi ndə won nə, nə nə ywàn zəɲə wa, ku ga tə yi gana gana. Dıın don wá bà, nə nə wá na ku won tə nə yía tətə wa. Síún nə, à tə yèrì tə mama. Dıın don nə, à wá yəni tə mama, ndə Yu nə yèé nə nətv. ¹³ Síún nə, yìèn batwa nə ga tə nə wulə wuuu. Tə mù nə yi, sə lià kəni ba waa Zwezi nə wuuu, sə ba ja yala də Yu, sə ba sóni duən. Yá tə batwa tə wa, sonu tə nə dwə tə me.

14

*Yìèn tə, tə nə wulə Yu-Siɲu tarpıvn tə wa
(1 Korentə tián 12.4-7, 27-31; Romə tián
14.19)*

¹ Á dāñ me, sə á dé yáá, á sóni duən. Ku kwa nə, á pìà Yu-*Siɲu tarpınan tə. Tə mù tarpınan təntə wa, á pìà tarpıvn tə, ku nə yi ka swìn Yu nii sùràn tə, á doni tə duən tə. ² Liù tə, v nə swìn suyirə duən, ku tà ləzoni con nə, v swìn, ku ya Yu con nə, v swìn. Ku twá də Yu-Siɲu tə,

v ma swìn cígá, tē nē sègè. Kù mù nē pìn, liù
 mama ba tē sùràn tē dèh nēh. ³ Yá kù nē lwàn
 kù yì liù nē swìn Yù nii sùràn, kù mù yì lèzoni
 tē con nē v swìn. D sùràn tē daḡa ba jìàn Yù
 cwəḡə tē wa, v kwè ba, v zùrì ba bicanì Yù
 nyiən tē wa. ⁴ Liù tē, v nē swìn suyirə tē duən
 tē, kù ya v tətə jìàn nē v daḡa. Liù tē, v nē swìn
 Yù nii sùràn, kù ya Kərisə lià púlì tē jìàn nē, v
 daḡa. ⁵ À swə, sə á mama swìn suyirə tē duən
 tē. À dàh nē kùwə swə à doni, sə á mama swìn
 Yù nii sùràn tē. Liù tē, v nē swìn Yù nii sùràn
 tē, nē dwə liù tē, v nē swìn suyirə tē duən tē,
 dè liù tē, v nē swìn suyirə tē duən tē, nē ba tē
 dèh gwin, v buri Kərisə lià púlì tē, sə v ma dān
 ba jìàn.

⁶ À nubia-ba, à nywarì nē wá ya bèèè tətə,
 dè à nē twi á con, à wulə à swìn suyirə duən, á
 nē ba tē dèh nēh? À wá ja nywarì à pa aba, dè
 à nē swìn yoo, Yù nē buri nē, à buri aba, nē à
 yèé yoo, Yù nē pìn nē kù yənu, nē à yèé Yù nii
 sugu, nē à yèé kàrà. ⁷ Nē wá tì gwaran wiən,
 sə nē ma man. Kù mù nē yì nabwanu nē à yèé
 kunkolu. Dè tē kwərə tē nē ba lwànì duən wa,
 nətə nē ba wá twá, ba ma lwarì kù tē nē swìn.
⁸ Dè ba nē kùwə wúrí kùwə nabwana gurə gurə,
 nətə nē kwatara wá fwa, ba ma lwarì dè, kù
 yì kùwə, sə ba kə ba sírí? ⁹ Mə kù yì nətə á dè
 con. Dè sugu tē, á nē swìn suyirə duən tē wa,
 kù dèh nē ba nēh, nətə nē ba wá lwarì kù tē, á
 nē swìn. Kù nē yìn nətə, á wá swìn woru wa.
¹⁰ Suyirə duən dáá tia yuu wa. Yá suyiri mama
 təlè tē wa, ba nē ba kù dèh nēh. ¹¹ Yá à dàh nē

ba sugu dèñ nèn, ba nè ma swìn à con, liù tə, v nè swìn ku, wá ya ndə vee nè à con, à də ga wá ya ndə vee nè v də con. ¹² Mə ku yi nətə á də con. Ku mù nè pın, á kənə kajaŋa mama á ma pìà Yı-Sıŋu tarpınan tə. Á kənə dıàn, sə á wàní á na tə tə, tə nè daŋa Kərisə lià púlí tə jıàn, sə tə ya zənzən.

¹³ Ku mù yırı nə, liù tə, v nè swìn suyirə duən, tə dèñ nə ba nèn, sə ku tíú lòrì Yı, sə v wàní v gwin tə dèñ. ¹⁴ À nè jùnì Yı də suyirə təntə, à jərə wulə yıjıni tə wa, yá à pubuŋa tə ga yi ku cıci. ¹⁵ À dən wá fwa bèèèe? Á wá jun Yı də à jərə, yá à tə ga jun Yı də à pubuŋa tə də. Á wá nun də à jərə, yá à tə ga nun də à pubuŋa tə də. ¹⁶ Də n nə kəni Yı lèèèe də n jərə cıci, nətə nə liù tə, v nè yèrì tə yìèn təntə v nè jəə á mù Kərisə lià púlí tə wa, wá twá, v ma swìn, v wú: «Amına», n nə kəni Yı lèèèe tə yırı? D bá wàní v lwarı ku tə, n nə swìn tə. ¹⁷ Də n yıjıni tə yà nə zıən zənzən, də ku wà liù təntə jıàn dən. ¹⁸ À mù Polə, à kəni Yı lèèèe də, à nə swìn suyirə tə duən tə, à doni á mama. ¹⁹ À mù dən nə swə, sə à swìn sùràn ndə bonu nə də à pubuŋa, tə dèñ nə nèn Kərisə lià púlí tə yáá con, sə tə kàrì ba. Ku mù nə dwə sùràn mùrù mùrù, à nə wá swìn də suyirə tə duən tə, yá tə dèñ ga ba nèn.

²⁰ À nubıa-ba, á yanı nəkwına nətə tə á pubuŋa tə nə buŋa wa. Á dənà ká ya ndə bısıná nə á pubuŋa wa. Ku nə yi lwanı yoo wa, á yanı ndə bısıná nə. ²¹ Á nəŋə ku púpúní Yı sagı tə

wa, ku wú:

«À mò *Yuu-Tiu nə swìn ku. Ku wá twá lià duən sùràn nə, à ma swìn lià təntə con. Á wá twá də vee, à ma swìn ba con. Də ku nətu mama, ba tə bá sèe, ba cugu à sugu».

²² Suyirə tə duən tə ya lià tə, ba nə tà Kərisə lià nə, tə pià tə biri yoo. Tə ba pià tə biri yoo Kərisə lià tə nə. Yu nii sùràn tə də kúv ba pià tə biri yoo lià tə, ba nə tà Kərisə lià tə. Ku ya Kərisə lià tə nə, tə pià tə biri yoo. ²³ Də Kərisə lià púlí tə mama nə kun duən nə, ba swìn suyirə duən tə, liù tə, v nə yèrì tə yìèn təntə, nə à yèé liù don, v nə tà Kərisə liù nə twi, v yí lá, v wá swìn də, á yì nyinyanan. ²⁴ Ku nə yì á mama swìn Yu nii sùràn, liù tə, v nə tà Kərisə liù nə twi, v yí lá, nə à yèé liù don, v nə yèrì tə yìèn təntə, nə twí, v yí lá, á mama sùràn tə wá biri ku tə, ku nə wulə v waa con. Yá ba mama wá pa v lwarì cígá tə v tətə yuu wa. ²⁵ D waa tə pubuŋi tə, tə nə sègè tə, nan poni nə. Yá v dàń wá tu v yáá yuu, v pa dun Yu nə, v swìn də, Yu cígá wulə á tətəŋi wa.

Nətv tə ku nə me, sə ku ya Kərisə lià púlí wa

(1 Piyerə 4.10-11)

²⁶ Á nubia-ba, bèeèe nə nə dàń me, sə nə fwa? Máná tə wa, á nə jèń duən yáá nə, sə á jòn Yu, sə á fwa nətən: Á liù nə jə nuŋə, v don nə jə kàrà, v don də nə jə yoo, Yu nə biri wá, v don də nə pià, v swìn suyirə tə duən tə, v don də nə pià, v gwin suyirə tə duən tə dèń, sə á fwa tə mama, sə tə wàní tə dàn Kərisə lià púlí

tə jìàn. ²⁷ Kɔ nə yɪ sɔyirə tə duən tə nə á pià á swìn, kɔ mɛ, də lià bələ, nə à yèé lià batwa, kɔ dàn ká doni nɛtɔ. Ba mɛ, sə ba swìn ba jon duən nə. Sə liù don də gwìn tə dèń. ²⁸ Də liù nə tɛlə, sə v gwìn tə dèń, sə liù tə, v nə swìn sɔyirə duən tə, pú v nii Kərisə lià púlí tə wa. Sə liù mama də swìn v tián con də Yɪ con. D dàn ká swìn sɔgɔ v pa kɔ nan v nii wa. ²⁹ Kɔ nə yɪ Yɪ nii *sùsùnà tə, sə ba lià bələ, nə à yèé batwa nə swìn. Yá ba duən tə ga cɔgɔ, ba jón, kɔ nə ya Yɪ nii sɔgɔ nə ba swìn.

³⁰ Liù don nə kùè nɪ yoo, Yɪ nə bɪrɪ wá, sə tɛntɛn liù tə pú v nii. ³¹ Á mama wàá Yɪ nii sùràn tə, á swìn, sə tə kàrì lià tə mama, tə ga kwè ba. ³² Yɪ nii sùsùnà tarpɪvɔn tə mɛ, sə kɔ sèe ba nii won mama wa. ³³ Yɪ pià, sə nə jə bɪcan sié də duən. D ba pià, sə nə ya gurə gurə lià də duən.

Kərisə lià púlí tə wa kana tə yoo

³⁴ Máná tə wa, á mù *Kərisə lià, tə nə kun duən nə, kana tə mɛ, sə ba pú ba níé, ndə kɔ nə tɔɲa nɛtɔ Kərisə lià púlé tə mama wa. Cwəɲə tɛlə kɔ pa ba, sə ba swìn, ndə kɔ nə swìn Yɪ sagɪ tə wa, də ba mɛ, sə ba sèe nii nɛtɔ. ³⁵ Də ba nə jə yoo, sə ba bwe, sə ba bwe ba bana tə sàń nə. Kɔ wà mɛ, sə kan swìn Kərisə lià púlí jéré wa. ³⁶ Á buɲa də, Yɪ sɔgɔ tə yɪ kɔ nan á mù con naaa? Nə à yèé kɔ yɪ á buɲa də, Yɪ sɔgɔ tə yɪ á mù cɪcɪ con nə kɔ twi naaa?

³⁷ Liù tə, v nə buɲa də, v yɪ Yɪ nii *sùsùnù, v nə buɲa də, Yɪ-*Siɲu tə wulə də wá, sə kɔ tíú lwarɪ də, tə tə, à nə púpúní à pɪn aba, kɔ

ya *Yuu-Tiu nə pɪn nii yoo tɛntə yuu wa. ³⁸ Də liù nə ba ku tɛ, à nə púpúní tɛ sɛ, Yuu-Tiu Yɪ də bá sɛ ku tíú. ³⁹ À nubɪa-ba, ku nɛtv tɛ wa nə, á dǎn mɛ, sɛ á dí yáá á pià ka swìn Yɪ nii sùràn tɛ. Yá á nə dǎn ká cì, sɛ ba swìn suyirɛ tɛ duən tɛ. ⁴⁰ Ku mɛ, sɛ won mama fwa, ndɛ ku nə mɛ nɛtv, ku tì ku cwɛɲɛ.

15

*Zwezi-Kərisə nə bwin v nan tian wa yoo
(Matìə 28; Marəkə 16; Zwan 20; 21; Tɔtv-
nan 1.3)*

¹ À nubɪa-ba, à pià, sɛ à piì à líí aba suywǎɲú tɛntɛ, à nə dɛ yáá à swìn á con. Ku suywǎɲú tɛntɛ á nə sɛ ku, á ga zigɪ dǎn ku yoo wa. ² Ku mù nə pɪn, Yɪ twá suywǎɲú tɛntɛ nə, v jon aba á cuna wa. Á cígá twá ku nii nə, ndɛ à nə swìn ku á con nɛtv. Ku nə tà nɛtv, ku ya tɔtv dɛ, á nə ken á waa Yɪ nə.

³ À dí yáá à swìn *Yuu-Tiu Zwezi sùràn tɛ, à nə nì, à bɪrɪ aba. Zwezi-*Kərisə yɪ v tɪga nə mù cuna yɪrɪ, ndɛ ku nə púpúní Yɪ sagɪ tɛ wa nɛtv. ⁴ Ba gùrì wá, yá Yɪ piì v bwin wá dɪan batwa dɪn nə, ndɛ ku nə púpúní Yɪ sagɪ tɛ wa nɛtv. ⁵ D nan v bɪrɪ v tiàn Sefasə* nə. Ku kwa nə, v nan v bɪrɪ v tiàn v *tɔtvna fugɛ bɛlɛ tɛ nə. ⁶ Ku kwa nə, v nan v bɪrɪ v tiàn lià duən nə, ba nə yɪ nubɪa Kərisə yɪrɪ. Ba lià tɛntɛ dwɛ lià biənu (500), ba nə twá duən, ba na wá naa nɛdv. Ba mù lià tɛntɛ zɔnɪ tɛ wulɛ lɔv wa. Ba duən dɛ tɪga. ⁷ Ku kwa nə, v nan v bɪrɪ v

* **15:5** 15.5 Sefasə yà jɛ yɪrɪ don, ba nə boɲɛ Piyɛrɛ.

tìàn Zwakə nə, v nan lá v biri v tìàn v tuntuna tə mama nə. ⁸ Ba mù tə mama kwa nə, v nan à də Polə nə. À mù dàń yí ndə biú nə, ba nə cen†. ⁹ À ken càn Kərisə lià púlí tə nə. Kú mù nə pín, à yí Zwezi-Kərisə tuntuna tə me kwa liù. Kú cígá mama wa, à wà me, sə ba bon nə tuntunv. ¹⁰ Də nətə tə mama, à nə cùgù Yú nə, v tə fwa pubwanv à yíra. Kú mù nə pín, à ma yí kú tə, à nə yí zèn. Yá pubwanv tə, Yú nə fwa à yíra, wà tutv yín mama. À tun à doni tuntuna tə duən tə mama. Kú tà à mù nə tɔŋa nətə, kú cígá mama wa, kú ya Yú pubwanv tə, kú nə wulə də nə, nə twá də nə kú tɔŋa. ¹¹ Kú dàń nə yí à mù, nə à yèé kú nə yí tuntuna tə duən tə, á nɛŋə Yú sugv tə, nə nə swìn nə biri. Mə kú mù nə nə á twá, á ma kəni á waa Zwezi nə.

*Nə ka pìí ka bwin ka nan tian wa yoo
(Likə 20.27-38; 1 Piyerə 1.3-5)*

¹² Də ba nə swìn Yú sùràn ba biri də, Zwezi-Kərisə bwin v nan tian wa, bèèè nə pín, á wa lià duən ma swìn, də ka pìí ka bwin ka nan tian wa təló? ¹³ Də ka bwin ka nan tian wa nə təló, Zwezi-Kərisə də wà bwin v nan tian wa! ¹⁴ Yá Zwezi-Kərisə nə wà bwin v nan tian wa, nə kàrà tə ya tutv, yá á nə ken á waa Yú nə tə, də ya tutv. ¹⁵ Də ka bwin ka nan tian wa yà nə təló, yá nə ga swìn nə biri də, Yú bwin Zwezi-Kərisə v lí tian wa, yá Yú ga wà wá bwin, kú nətə tə biri də, nə ya kunkuna Yú

† **15:8** 15.8 Sugv təntə yí Polə pìà, sə v ma biri də, v nə jigə Kərisə liù tə, yí yoo tə, kú yà nə wà me. (Ywàń Tutənan 9!)

yáá con. ¹⁶ Dø tuga nè ba bwin ba naŋa tian wa, Zwezi-Kørisø dø wà bwin v nan tian wa! ¹⁷ Yá Zwezi-Kørisø nè wà bwin v nan tian, á waa tø, á nè kení wá nè ya tütü. Yá Yu tø wà á cuna tø kwen, v li á mù dø wá pwøø wa. ¹⁸ Ba tø dø, ba nè ken waa Zwezi-Kørisø nè, ba ga ti tø dø jén míámíán. ¹⁹ Ku nè yi nè luv mu ku tø cici wa, nè nè jø yala dø Zwezi, nè ya yinøø nyina, nè doni là tø mama.

²⁰ Ku tà nøtv, Zwezi-Kørisø cígá bwin v nan tian wa. D mù nè yi tuga tø tøntøn liù, v nè biri dø, ba wá bwin ba nan tian wa. ²¹ Ndø tian nè twá, dø liù nødv tø ma bà luv wa, mø nøtv, ka bwin ka nan tian wa dø twá dø liù don, ku ma bà luv wa. ²² Lià tø mama ya Adamø nián. Ku mù nè pin, ba mama ti ndø v nè. Yá lià tø mama, ba dø Zwezi-Kørisø nè vwø duøn nè, ba dø wá pii ba bwin ba nan tian wa, ndø v nè. ²³ Ba mù lià tøntø wá pú duøn kwa, ba bwin ba nan tian wa. Zwezi-Kørisø mù yi tøntøn liù, v nè bwin v nan tian wa. Diun tø, v nè wá pii v bà, lià tø mama, ba nè yi v mù lià tø dø, dàñ wá bwin ba nan tian wa. ²⁴ Ku kwa nè, luv dàñ wá zigi lá ku zàn. Zwezi-Kørisø dàñ wá cøgù wiøn tø nè jø diàn yiri mama míámíán. D wá cøgù wiøn tø mama, tø nè dé pàri, dø diàn tián tø mama, ba nè ziga v nè míámíán. Yá v dàñ wá pii, v pa pàri tø v nyina Yu nè. ²⁵ Zwezi-Kørisø nè pii v bà, ku me, sè v dé pàri tø wuuu. Ku jø vølø máñá tø wa, v nè wá kè v duŋa tø mama v juun wa. ²⁶ Tian nè ya talikwa duŋv tø, v nè wá cøgù.

²⁷ Ku pópúní Yu sagi tø wa, ku wú: «Yu

ken wiən tə mama ɔ juən wa». Ku yoo təntə yɪ nəpon, ku ba pìà ku swìn də, Yɪ tətə twá ɔ wulə ɔ biú tə juən wa. Ku yɪ, ɔ mù Yɪ nə ken wiən tə duən tə mama ɔ biú tə juən wa. ²⁸ Mánǵá tə wa, wiən tə mama nə wá ya Zwezi-Kərisə jìàn wa, ɔ də tətə dàń wá kə ɔ tìàn ɔ nyɪna Yɪ jìàn wa. Mə ku wá yà nətɔ, Yɪ dàń ma dé pàrì wiən tə mama yuu wa míámíán.

²⁹ Á yəə də, là wulə, ba nə yàá pa, ba lə ba níá wa, ku twá də Yɪ yɪrɪ tə, tɪga yuu yɪrɪ. Də tɪga cíǵá nə bá bwin ba naŋa tian wa, bèèèe won nə ku tián təntə fwa ku nətɔ, sə ba na ku wa? ³⁰ Də ka pìí ka bwin ka nan tian wa nə təlél, bèèèe nə pɪn, nə mù ma kəni nə tìàn cwəŋə wa, ku nə pìà ku ɣɔ nəba, mánǵá mama. ³¹ À nubia-ba, dɪn mama à mu yàá pìà ku nan. À ja pupwən də aba. Ku mù nə pɪn, à swìn ku yoo təntə á con, nə mù də nə Yuu-Tiu *nimaru tə yɪrɪ. ³² Á mù jan də ɣanaŋa‡ Efezə wa yəbè. Də à pubɔŋa tə nə ya tɪa ka tə yuu wiən tə cɪcɪ yɪrɪ, bèèèe won nə à wá na ku jaŋa təntə wa? Də tɪga yà nə bá bwin ba nan, zwansısara ka tə yà wá ya cíǵá. Zwansısara təntə swìn, ku wú:

«Jwian nə, nə wá tɪ, ku mù yɪrɪ, nə díé də nə nywìn, nə dàń ká fwa won mama».

³³ Zwansısara don də swìn, ku wú: «Á dàńà ká ɣɪgarɪ á tìàn. Twadon kəkwiɔn yva nə cùgà twadon nəzəŋu yva». ³⁴ Á pìé á kə á pubɔŋa tə

‡ **15:32** 15.32 ɣanaŋa təntə Polə nə jan də tə, wáá ɣanaŋa cíǵá cíǵá ku yanɪ, ku ma kúò wáá ləzoni, ba nə yɪ ndə ɣanaŋa nə ku yanɪ.

cígá tē wa, ndē kv nē mē nētʋ, sē á dàñ yá cūna tē fāñú nē. Kv yí á caviyoo nē à swìn nētʋ: Á wa lià duən yèrì Yü.

*Yüra tē tıga nē wá bwin ba nan dē kv
(Filipə tián 3.20-21; 1 Zwan 3.2-3)*

³⁵ Á yèé dē, lià duən wá bwe, sē ba jén, nētə nē tıga wá bwin ba nan tıan wa? Ba yüra tē wá yà nētə? ³⁶ Liù tē, n nē bwe kv bwıə tēntə, n yí ləyərü! N nē dùè wobıu, n kē tıa, wobıu tēntə wàrì vʋv kv bwin, dē kv nē wà tı kv pʋ. ³⁷ Kv tē n nē dùè, n kē tıa, tē ya wobıu cıci. Dün don, kv yí mıbıa, nē à yèé won yiri don, kv tà mını sısıv tē, dē kv vıran tē, kv nē pen, kv dı yü nē tē. ³⁸ Yü nē yáá pa sısıv dē kv vıran wobıu tēntə nē, ndē v nē pıà nētʋ. Yü nē pın wobıu dē mama kv vʋv yiri.

³⁹ Wiən tē, tē mü nē sıñə, dē yüra tē tà nēdv. Ləzoni yüra dē yiri yí kv cıci. Váná dē yüra yiri yí kv cıci. Zéñé dē yüra yiri yí kv cıci. Fələ dē yüra yiri yí kv cıci. ⁴⁰ Lanworu tē wa wiən wulə lá, tē nē jə yüra. Tıa tē dē yuu wa wiən wulə lá, tē nē jə yüra. Lanworu tē wa wiən tē zəni, dē tıa yuu wiən tē zəni tà nēdv. ⁴¹ Yıcau tē zəni dē yí kv cıci. Cànà tē dē zəni yí kv cıci. Kacılace tē dē zəni kúv yí kv cıci. Kacılace tē mù tətə zəni tà nēdv.

⁴² Mē kv wá ya nētʋ máñá tē wa, tıga nē wá bwin ba nan tıan wa. Máñá tē, ba nē gürì yüra tıa, kv yüra tēntə yí wotıgv, kv wá pʋ. Yá máñá tē wa, Yü nē wá pıí v bwin kv, v li tıan wa, kv yüra tēntə kúv wàrì kv tı kv pʋı. ⁴³ Máñá tē wa, ba nē gürì kv tıa, kv ba dún jə, kv ga

ba diàn də jə. Yá máǵá tə wa, Yı nə wá pìi v bwin kv, v li tian wa, kv wá ja dun, kv ga jə diàn də. ⁴⁴ Máǵá tə wa, ba nə gùrì yıra tə tia, kv yı tia yuu yıra. Yá máǵá tə wa, Yı nə wá bwin kv, v li tian wa, kv dǎn wá ya Yı *sǎn yıra. Də tia yuu yıra nə wulə, Yı sǎn yıra də wulə. ⁴⁵ Kv mù yoo tə púpúní Yı sagı tə wa, kv wú: «Təntən bεε tə, kv nə yı Adamə jigə ləzwəniǵu». Talıkwǵ Adamə tə, v mù jigə siǵu, kv nə pın muı, kv nə ba zwèe Yı con, lià nə. ⁴⁶ Kv tà Yı sǎn yıra tə, ba yà dé yáá ba na, kv yı tia yuu yıra tə. Kv mù kwa nə, ba wá na Yı sǎn yıra tə. ⁴⁷ Təntən liù tə yı tıran nə, Yı ma fwa wá, kv pa v yı tia yuu liù. Bələ nii liù tə mù yı Yı sǎn liù. ⁴⁸ Ba tə, ba nə wulə tia yuu, nyın də bεε tə, Yı nə fwa də tıran tə. Ba tə də, ba nə wulə Yı con, də nyın də bεε tə, v nə nan Yı sǎn tə. ⁴⁹ Ndə nətı tə, nə nə nyın də tia yuu bεε tə, mə nətı nə wá nyın də Yı sǎn bεε tə.

(1 Tesalonikə tián 4.13-18)

⁵⁰ À nubıa-ba, á nəǵə kv tə, à nə pìà, sə à swın. Yıra tə, tə nə yı nəǵú də jana nə fwa, wàrì kv twá kv yanı Yı pàrì tə wa. Yá tia yuu yıra tə, kv nə wá pı, wàrì Yı sǎn yıra tə, kv nə ba pwi, wiən tə kv janı. ⁵¹ Kv yı yosəgu nə, à bırı aba. Nə mama, nə bá tí. Nə mama yıra tə wá lwǎn. ⁵² Máǵá don wa, ba nə wá wúrú nabwana talıkwǵ dıın tə nə. Nə mama dǎn wá lwǎn naa nədv, ndə yii pwiu də kv súrú nə. Nabwana tə wá wúrí, Yı ga bwin tıga tə,

§ 15:45 15.45 Talıkwǵ Adamə tə nə yı Zwezi-*Kərisə.

ba nan də yira, tə nə ba pwi. Yá nə də yira, tə ga lwań ku jì ndə ba nə. ⁵³ Nə yira tə, ku nə ti ku pwi tə dǎn mə, sə ku lwań ku jì yira tə, ku nə ba ti ku pwi.

⁵⁴ Mǎǎ tə wa, yira tə, ku nə ti ku pwi, tə nə wá lwań, ku ba ti ku ba pwi tə, ku mǎǎ tə wa, ku tə nə púpúní Yü sagı tə wa, tə nii dǎn wá sú. Ku swìn, ku wú:

«Tian kúò tǎlé, Yü dí diàn tian yuu wa. ⁵⁵ Tian, sə n diàn tə wa yèn? Tian, sə n siliu tə, n nə ma zwe là tə, n gwi tə wa yèn?»

⁵⁶ Tian yi tə twá də cuna, tə ma jə diàn nə yuu wa. Cuna də twá də Yü *nii tə, v nə pın *Moyizə nə, tə ma jə diàn nə yuu wa. ⁵⁷ Ku mù yiri nə, nə kəni Yü lèèè, v nə pın, sə nə dé diàn cuna də tian mə yuu wa. Ku nətə twá, də nə Yuu-Tiu Zwezi-Kərisə diàn tə.

⁵⁸ À nubisoni-ba, ku mù tǎntə yiri nə, á zıga diàn. Á dǎnà ká pa won mama gwàrì á vǎnà. Á kənə diàn á tǎn Yuu-Tiu tǎtǎtǎ tə, á súrì wuuu. Á lwarı də, á də tǎtǎnan tə, á nə tǎǎ á pın Yuu-Tiu nə, tə bá ya tǎtǎ, v kwa.

16

Səbiu tə ba nə lé, sə ku san là tə nə, Kərisə nə ti, yoo

(2 Korentə tián 8; 9; Romə tián 15.25-27)

¹ À mù Polə pià, sə à swìn yoo səbiu tə yuu wa, á nə lé, sə ku san là tə nə, ba nə yi *Kərisə nə ti, ba nə wulə *Zwerizalemə nə. Ku səbiu tǎntə yoo wa, á də mə, sə á fwa ndə nətə tə nə,

à nè swìn Galasi nagwanaa tə wa, Kərisə lià tə con, sə ba də fwa. ² Laadi dɪn mama, səbiu tə, á liù mama nə jə, ʋ mə, sə ʋ li ku tə, ʋ nə wàà ʋ tɪn vàn nə. Á tuŋə ku səbiu təntə vàn nə, sə máŋá tə wa, à nə wá bà á con, á kúvè dànà ká lé səbiu. ³ Máŋá tə wa, à nə wá yí á con, à wá púpúní saga à pa lià tə nə, á tətə nə wá kúrí, à ma tun ba də səbiu tə Zwerizalemə nə. ⁴ Də ku nə mə, sə à tətə va, ba mù də à mù wá twá duən nə víí.

Wiən tə, Polə nə pìà, sə ʋ fwa

⁵ À pìà, sə à twá Masedwanə nagwanaa tə wa à lɛ. Ku kwa nə, à wá bà à na aba. ⁶ Dɪn don, à wá ya á con dɪn bələ. Dɪn don waran* tə máŋá tə mama wa, à wá ya á con. Á nə kúvè wá nan á con, sə à víí á wá san nə də ku tə, ku nə wá pa à lɛ à va, à nə vèli lá. ⁷ À ba pìà, sə à bà à zɪɪ yu nə à mà à lɛ. À pìà də, ku nə ya *Yuu-Tiu fira, sə nə ya duən nə ku dání. ⁸⁻⁹ Yu súrí cwəŋə nəzəŋu ʋ pa nə, sə à ma tun ʋ tutuŋi tə yəbə. Yá duŋa tə də dáá zənzən pən. À dān tə wá ya yəbə Efezə wa, ku jə vələ *Pantəkotə cànà tə.

¹⁰ Timote də tuŋa Yuu-Tiu tutuŋi tə, ndə à də nə tuŋa ku nətv. Də ʋ nə twi á con, sə á ja wá zəni á pa ʋ nì ʋ nywání. ¹¹ Sə á liù mama dān ká mun wá. Á dān saŋa wá də ʋ cwəŋə tə vèli tə, sə ʋ wàní ʋ víí də yazurə. Sə ʋ bà ʋ yí nə də

* **16:6** 16.6 Waran təntə máŋá wa, liù wàri tu ʋ vèli. Waran təntə yàá bà bununu cànà tə wa, ku ja vələ yarıkafə cànà tə wa.

zəni. À mù Polə də *Kərisə lià tə duən tə dànì wá yəbə.

¹² Apoləsə mù, ɔ nə yɪ nə nubiu Kərisə yɪɾɪ, yoo wa, à lòrì wá nəε kapɔɾɔ, sə ɔ mù də Kərisə lià tə duən tə bà ba na aba. Yá ɔ yà tə ba pià, sə ɔ bà á con síún. Máná tə wa, ɔ nə ni buɔ, ɔ wá bà.

*Polə svɔv tə, ɔ nə ma gúrí ɔ sagɪ tə
(1 Tesalonikə tián 5.5-13)*

¹³ Á dànà ká dwèe. Á zɪga diàn á kən á waa Zwezi nə wuuu. Á pɪan á jìàn dàn. Á yana diàn tián *Yuu-Tiu tutɔɾɪ tə wa. ¹⁴ Sə won tə mama, á nə fwa á pwərə wa, sə kv twá də sonu kv ma tɔn.

¹⁵ À nubɪa-ba, á mama yèé Sətefanasə də ɔ diè lià mama. Á yèé də, ba mù nə yɪ təntən lià, ba nə ken ba waa Zwezi-*Kərisə nə wuuu, Akayi nagwanaa tə wa. Yá ba tì ba tiàn mama ba kə Yuu-Tiu tutɔɾɪ tə wa, sə ba ma san lià tə nə, ba nə yɪ Kərisə nə ti. ¹⁶ À nubɪa-ba, à lòrì aba, sə á zìlí ɔ mù liù təntə. Á zìlé ba tə də mama, ba mù də wá nə tɔɾa də duən zənzən.

¹⁷ À fwa pupwən zənzən də Sətefanasə də Fɔrətinatisə də Akayikisə nə twi à con. Ba nə twi à con, kv yɪ ndə á mù nə twi à con. ¹⁸ Ba dàn à jìàn, ndə ba nə dàn á də jìàn. Kv mù ləzwənyiri təntə á zìlé ba zəni.

¹⁹ Kərisə lià púlí tə Azi nagwanaa wa yəbə, jùnà aba. Akilasə də ɔ kan Pərisilə də Kərisə lià púlí tə, ba mù də ba, nə yàá jùnì Yɪ ba diè tə, jùnà aba zəni də Yuu-Tiu yɪɾɪ tə. ²⁰ Lià tə mama, ba nə wulə yəbə, ba nə yɪ á nubɪa

Kərisə yiri tə, də jònà aba. Á jòná duən də zìlé zənzən də sonu, ndə Kərisə là nə mɛ, sə ba fwa nətɔ.

²¹ Kɔ tə yi à tətə nə púpúní də à jìàn, à wú: «À mù Polə də jònà aba».

²² Lù tə, ɔ nə ba Yuu-Tiu swə, sə Yu cùgù kɔ tíú. Maranata! Kɔ mù nə yi: Sə nə Yuu-Tiu bà! ²³ Nə Yuu-Tiu Zwezi nə wá fwa pubwanɔ á yira. ²⁴ À swə á mama, nə mama míámíán vwə Zwezi-Kərisə yira.

Yu sɔywáŋó sagɪ
Nuni, Southern: Yu sɔywáŋó sagɪ New Testament
Le Nouveau Testament en Nun

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Sep 2022 from source files dated 8 Feb 2022

d18530a7-7259-5f23-92b6-70e3abe5f3fa